

NO MARKUUSA YOTTINIRI LINJIILA ON NON

Fii Waaju Annabi Yaayaa ngun

(Mat. 3.1-12; Luk. 3.1-18; Yhn. 1.19-28)

1 ¹Ko fuddoode Kibaaru Moyyo Iisaa Almasiihu, *Biddo Alla on, nii. ²Wano windori non ka deftere annabi *Isaaya:

«Awa, mido imminde nulaado an on yeeso maa,
fii ko fertano-maa laawol maa ngol.»

³ «Kaa hawa ko hawa ewnotoodo ka wulaa, wi'a:
«Moyyinee laawol Joomiraado on,
fewnon juri makko din!»^a

⁴ Yaayaa yaltiti no *loota maande tuubuubuyee ka wulaa, e himo waajoo yimbe
ben yobe aru, be *lootee maande tuubuubuyee fii yo junuubaaji mabbe din yaafe.

⁵ Yimbe diiwal *Yahuuda ngal fow e hodube *Yerusalaam ben fow ari e makko. Be
qirritii junuubaaji mabbe din, o looti be maande tuubuubuyee ka maayo
Yurdayniwol. ⁶Tawi dolokke Yaayaa on ko leebi ngelooba, dattol keeci makko din
ko guri. Tawi ko kanu e njuuri buruure o jaamata. ⁷Kanko Yaayaa o wi'i: «Burdo
lan doole on no arude baawo an mo mi hewtaa hay ugginagol, firta boggi pade
mun. ⁸Min ko ndiyan mi woni on lootirde, kono kanko ko *Ruuhu Seniido on o
lootirta on.»

Fii Lootegol Iisaa e Ndarndegol Makko

(Mat. 3.13-17; Luk. 3.21-22)

⁹ Ko e on saa'i don Iisaa iwi saare Naasirata e nder Jaliilu. Yaayaa looti mo
Yurdayniwol. ¹⁰E saa'i mo o yawaynoo ka ndiyan on, o yi'i kammu ngun no

^a1.3 Mal. 3.1 e Isa. 40.3

udditoo, Ruuhu Allaahu on no tippora e makko wa gabooru.¹¹ Onsay hawa nanii ka kammu, no wi'a: «Ko an woni Biddo an yidaado on, mido weltor-maa.»

¹² Onsay kisan, Ruuhu Allaahu on nawri Iisaa ka wulaa.¹³ O woni ka wulaa e nder balde cappande nay, Ibiliisa no ndarndoo mo. Tawi ko kulle buruure den o wondi, malaa'ikaabe ben no kurkanoo mo.

Fii Be Iisaa Adii Noddude ben

(Mat. 4.12-22; Luk. 4.14-15)

¹⁴ Bay wonii Yaayaa wattaama e joge, Iisaa yahi Jaliilu, tawi himo waajoo fii Kibaaru Moyyo Alla on,¹⁵ himo wi'a: «Saa'i on hewtii, awa kadi *laamu Alla ngun badike! Tuubee, gomdinon Kibaaru Moyyo on!»

¹⁶ E nder ko o takkotoo *Weendu Jaliilu ndun kon, o yi'i Sim'uunu e Andaraawu mijnjiraawo mun on no bugoo *jalaaji ka weendu, ko fii hari ko be yungoobe.

¹⁷ Iisaa wi'i be: «Jokkee lan, mi wattay on yungoobe yimbe.»¹⁸ Don kisan be acciti jalaaji din, be jokki mo.

¹⁹ No be yaarunoo seeda, Iisaa yi'i Yaaquuba biddo Zabadii on, e Yuuhanna mijnan makko kanko Yaaquuba, tawi ben kadi no e nder laana, hibe moyyintina jalaaji mabbe.²⁰ Kanko Iisaa o noddi be kisan, be acci don ben mabbe Zabadii ka nder laana, wondude e yettanoobe golle ben, be jokki mo.

Fii no Iisaa Radori Jinnawii e nder Neddo

(Luk. 4.31-37)

²¹ Be yahi Kafernahuum. E *jalaande fowteteende nden, dun ko aseweere nden, Iisaa naati ka juulirde, woni e jannugol.²² Ko o jannaynoo kon yaldini jamaa on, ko fii himo janniraynoo bawgal, hara wonaa wano jannoobe fii Sariya on ben janniraynoo non.²³ Hawrondiri neddo no ka juulirde mabbe don mo jinnawii bonngii nangi, on sonki, wi'i:²⁴ «Hey ko hondun faalanadaa men, an Iisaa oo

jeyaado Naasirata? Hara ko mulugol men arandaa? Min mido andi ko hombo wonu-maa, ko a *Seniido mo Alla!»

²⁵ Onsay Iisaa yamiri ngii, wi'i: «Fanku, yaltaa e oo neddo!»²⁶ Onsay ngin jinnawii yeýi on neddo, ngii yalti e makko, hingii haaca ko tiidi.

²⁷ Fow ñaldi, landondiri, ɓe wi'i: «Ko hondun woni du'un? Ko jannde heyre ardunde bawgal. Himo yamira hay jinnaaji bondi din, di doftoo mo!»²⁸ Onsay kisan, kibaaru fii makko lolli e nder diiwal Jaliilu ngal fow.

Fii no Iisaa Nawndiri Nawnube buy

(Mat. 8.14-17; Luk. 4.38-41)

²⁹ Bay ɓe yaltii ka juulirde don, kambe e Yaaquuba e Yuuhanna, ɓe yahi ka galle Sim'uunu e Andaraawu. ³⁰ Tawi esiraawo Sim'uunu suddiido on no waalii nawnaare nguli-bandu. Tun, ɓe wowlani Iisaa fii makko. ³¹ Iisaa ɓadii mo, nangi jungo ngon, immini mo. Nguli-bandu kin yalti e makko, kanko debbo on o woni e kurkanagol ɓe.

³² Bay nibbii, wonii naange ngen mutii, ɓe addani mo jawbe ben fow e ɓe jinna nangi ben fow. ³³ Tawi saare nden fow no mottondiri ka yeeso dambugal. ³⁴ O sellini jawbe buy, tampirnoobe nabbeeli nooneeji nooneeji. O radii kadi jinnaaji buy, o salii di wowla, bay hari hidi andi mo.

Fii no Iisaa Waajori e nder Jaliilu

(Luk. 4.42-44)

³⁵ Bimbi nden jande subaka, tawi hentaaki taho, o immii, o yalti, o yaari e nokkuure wuldinnde, o woni e toragol Alla. ³⁶ Onsay Sim'uunu e ɓe o wondunoo ben woni e dabbitugol mo. ³⁷ Bay wonii ɓe yi'ii mo, ɓe wi'i mo: «Fow no dabbitude on.»

³⁸ Iisaa jaabii 6e, o wi'i: «Yahen ka kodooli kawtirdi e doo, fii yo mi waajo ton kadi, ko fii ko dun addimmi.»³⁹ Onsay o yahi e nder Jaliilu fow, himo waajoo e nder juulirde den, radoo jinna.

Fii no Iisaa Nawndiri mo Damajan

(Mat. 8.1-4; Luk. 5.12-16)

⁴⁰ Onsay mo damajan ari e makko, jicci, jeeji mo, wi'i: «Si hidon yidi, hidon waawi lan sellinde, mi laaba.»

⁴¹ Iisaa yurmaa mo, fonti jungo mun ngon, meemi mo, wi'i: «Mido yidi, laato selludo laabaa.»⁴² Don kisan, damajan dan iwi e makko, o selli, o laabi.

⁴³ Iisaa immintini mo kisan e hoore yamiroore sattunde, ⁴⁴ o wi'i mo: «Reeno wota a wowlan dun hay gooto, kono yahu hollitoyodaa *yottinoowo sadaka on, ittaa sadaka fii ko labbinadaa kon wano Muusaa yamiri non, fii yo dun wonan 6e seede.»⁴⁵ Bay wonii on neddo yahii, o woni e wowlugol townna ko wadi kon, e lollingol haa tawi Iisaa waawataa naatude han kadi e saare e kene, kono ko ka baawo ka wuldini o wonaynoo. Tawi no iwree e cende den fow, aree e makko.

Fii no Iisaa Imminiri Maaya-Banduujo

(Mat. 9.1-8; Luk. 5.17-26)

2 ¹ Balde seeda bawto dun, Iisaa arti Kafernahuum, yimbe ben andi wonde himo ka suudu. ² Yimbe duudube moobii don, tawi hay ka dambugal alaa ka rewee, Iisaa no yewta 6e daaluyee on. ³ Yimbe nayo rondii maaya-banduujo, addani mo. ⁴ Nde tawnoo 6e waawataa mo hewtinde Iisaa sabu duudugol jamaa on, 6e tufi warnakere nden fewndo ka Iisaa woni don, 6e tippindini on maaya-banduujo e boggi dimbordi din. ⁵ Bay Iisaa yi'ii gomfinal mabbe ngal, o wi'i maaya-banduujo on: «Boobo an, junuubaaji maa din yaafaama.»

⁶ Tawi wobbe e jannoobe fii Sariya on no don, hibe mijooy ka berde maabbe: ⁷ «Ko fii hondun oo kan wowliranta nii? Dun ko hoynugol Alla! Ko hombo waawi yaafaade junuubi, ko wonaa Alla?»

⁸ Iisaa andiri kisan ruuhu mun on mijooji maabbe din. O wi'i be: «Ko hondun mijantodon dun ka berde mon? ⁹ Enee, hakkunde wi'ugol maaya-banduujo <junuubaaji maa din yaafaama> e <immo yettaa boggi-dimbordi maa din, yahaa>, ko hondun e dii doo buri weebude? ¹⁰ Fii no andiron wonde *Bii-Aaden on no mari bawgal ka aduna doo fii yaafagol junuubaaji», ¹¹ o wi'i jukkudo on: «Mi yamirii ma, immo yettaa boggi-dimbordi maa din, hootaa ka maa.»

¹² On immii don kisan yeeso mabbe, o yetti boggi dimbordi makko din, o yalti. Sabu dun wadi be fow be haawii, tawi hibe mawnina Alla, wi'a: «Hari haa hande men yi'aali sifa dun!»

Fii no Lewi Jokkiri Iisaa

(Mat. 9.9-13; Luk. 5.27-32)

¹³ Iisaa yiltori kadi ka daande weendu. Jamaa on fow ari e makko, o woni e jannugol be. ¹⁴ Wa ko Iisaa feyyata, o yi'i Lewi mo Alfaa no joodii ka yantirde sagalle. O wi'i mo: «Aru jokkaa mi!» Kanko Lewi o immii, o jokki mo.

¹⁵ Bawto dun, Iisaa joodii fii jaamugol ka suudu Lewi, tawi *yantoobe sagalle duudube e junuubankeebe duudube no joododi e makko, wondude e taalibaabe makko ben, ko fii hari jokkunoobe mo ben no duudi. ¹⁶ Bay jannoobe fii Sariya on, be fedde *Fariisiyaabe ben, yi'ii himo jaamida e yantoobe sagalle ben e junuubanke'en, be wi'i taalibaabe makko ben: «E ko fii hondun oo jaamidanta e yantoobe sagalle ben e junuubanke'en?»

¹⁷ Bay wonii Iisaa nanii dun, o wi'i be: «Hinaa sellube ben hatonjini e nawndoowo, kono ko nawbe ben. Awa min, wonaa noddugol feewube ben mi arani, kono ko junuubankeebe ben.»

Landal fii Hoorugol

(Mat. 9.14-17; Luk. 5.33-39)

¹⁸ Tawi taalibaabe Yaayaa ɓen e Fariisiyaabe ɓen kajun no hoori. Be ari, ɓe wi'i Iisaa: «Ko fii hondun taalibaabe Yaayaa ɓen e ɓe Fariisiyaabe ɓen kajun hooranta, hara taalibaabe maa ɓen kan alaa hoorude?»

¹⁹ Iisaa jaabii ɓe, wi'i: «Taw si njaatigiibe jom jomba no waawi hoorude nde hibe wondi e jom jomba? Be gasataa hoorude yeru jom jomba no wondi e mabbe.

²⁰ Aray e saa'i nde jom jomba pottinaa e hakkunde mabbe. Onsay e den balde don ɓe hooray.

²¹ «Hay gooto yettataa ceelol bagi keso walkira dolokke kiddo. Dun haray kesun dun naboray fow, wuddere nden burta yaajude. ²² Hay gooto kadi loowataa njaram kesan e nder bootooji guri kiddi. Si hinaa dun, dan njaram kesan wonay sabu ko feeri din guri. Onsay njaram dan woo, bootooji guri din woo, bona. Kono njaram kesan ko e nder bootooji guri kesi loowetee.»

Landal fii Nalaande Fowteteende nden

(Mat. 12.1-18; Luk. 6.1-5)

²³ E aseweere goo, dun ko *nalaande fowteteende nden, hari Iisaa no rewude e gese ngawri. E nder yaadu mabbe ndun, tawi taalibaabe makko ɓen no woocora cawti den gese. ²⁴ Fariisiyaabe ɓen wi'i mo: «Ko hondun bee wadanta ko dagaaki e nalaande fowteteende nden?»

²⁵ Kono Iisaa jaabii ɓe, wi'i: «Hara on jangaali haa hande ko Daawuuda wadunoo kon fewndo o weelaa, o faalaa ko o jaama, kanko e yimɓe wondunoobe e makko ɓen? ²⁶ O naati ka nder suudu Alla fewndo oo *yottinoowo mawdo sadaka wi'eteedo Abiiyaataraa, o jaami bireedijje weebitaade fii sadaka den, de tawata ko yottinoobe sadaka ɓen tun daganinoo jaamugol, o okkori kadi wondube e makko ɓen.»

²⁷ O wi'i ɓe kadi: «Aseweere nden ko fii yimɓe ɓen taganaa, yimɓe ɓen taganaaka fii aseweere nden. ²⁸ Ko dun si ko Bii-Aaden on woni jom hay ɲalaande fowteteende nden.»

Fii no Iisaa Selliniri Maaya-Jungoojo

(Mat. 12.9-14; Luk. 6.6-11)

3 ¹Iisaa naatiti kadi ka juulirde. Tawi maaya-jungoojo no nder ton.²Nde tawnoo *Fariisiyaabe ɓen no faalaa toonude Iisaa, ɓe ayni mo, hibe ndaara si o ɲawnday mo e *ɲalaande fowteteende nden. ³Iisaa wi'i on maaya-jungoojo: «Immo darodaa ka hakkunde doo.»

⁴ Ontuma Iisaa landii ɓen: «E hara no dagii ka goddo wada ko moyýi maa ko boni, danda wonkii maa wona sabu makki e *aseweere?» Kono ɓe deyýi.

⁵ Onsay Iisaa ndaari ɓe e hoore himo tikki, aani fii sattere berde mabbe den. O wi'i on neddo: «Fontu jungo maa ngon.» On fonti ngo, jungo makko ngon selli.

⁶Onsay Fariisiyaabeben yalti, ɓe woni e fewjodugol e yimɓe *Heroodu lando on fii no ɓe warira Iisaa.

Fii no Jamaa on Iwri hen fow, Ari e Iisaa

⁷ Bawto dun, Iisaa e taalibaabe mun ɓen yaari ka weendu. Jamaa moolanaado iwrudo ka diiwal Jaliilu e ka diiwal Yahuuda ⁸e Yerusalaam e Iduumma e leyde wonirde gada Yurdayniwl den e dii baŋjeeji Tiiri e Siduuna jokki mo. On jamaa, nanunoodo ko o wonnoo wadude kon fow ari e makko. ⁹Onsay Iisaa yamiri taalibaabe mun ɓen yo ɓe dabban mo laakun fii wota jamaa on biyu mo. ¹⁰Nde tawnoo himo sellinde yimɓe ɗuuɗube, tampirnoobe nabbeeli ɓen fow wubbi e makko fii meemugol mo. ¹¹Kono ɓe jinna nangi ɓen, si yi'ii Iisaa, jiccotonu yeeso makko, ewnoo, wi'a: «Ko a *Biddo Alla!»¹²Kono kanko Iisaa o yamirayno din jinnaaji, o tentina wota di fejnjin fii makko.

Fii no Iisaa Subori Sahaabaabe mun ɓen

(Mat. 10.1-4; Luk. 6.12-16)

¹³ Bawto dñun, Iisaa yawi e fello, o noddi ɓe o faalaa ɓen, ɓen ari e makko. ¹⁴ O subii sappoo e dido, o toddii ɓe *sahaabaabe, ko o wonda e mun, ko o immina waajoyoo, ¹⁵ wondude e bawgal fii radagol jinnaaji din. ¹⁶ Ben sappoo e dido, ɓe o toddii, ko Sim'uunu, on mo o jammi Petruusu, ¹⁷ e Yaaquuba mo Zabadii, e Yuuhanna neene-gooto on on (ben ɓe Iisaa jammi Bowanesiisa, ko woni firo dñun ko «bibbe-farnitere»), ¹⁸ e Andaraawu e Filiipu e Bartolomaawu e Matta e Tooma e Yaaquuba mo Alfaa e Taddaawu e Sim'uunu tawdaado e fedde *Zelotiibe ɓen, ¹⁹ e Yudaasi Iskariiyu, janfoytoodo mo on.

Fii no Iisaa Jaabori Toone de O Toonaa

(Mat. 12.22-32; Luk. 11.14-23)

²⁰ Bawto dñun, kanko Iisaa o arti ka suudu. Yimbe ɓen moobii kadi haa ka tawata kanko e taalibaabe makko ɓen ɓe waawataa hay naamude. ²¹ Bay sibbe Iisaa ɓen nanii dñun, ɓe ari nangugol mo, ko fii hari hibe wi'a: «O wilike!»

²² Nde tawnoo jannoobe fii Sariya on, iwrube Yerusalaam ɓen, no wi'a: «Balzabuula* no e makko, ko tippude e lando jinnaaji din o woni radorde jinnaaji din.»

²³ Onsay Iisaa noddi ɓe, yewtiri ɓe misal, o wi'i: «Ko honno Ibuliisa waawirta radorde Ibuliisa? ²⁴ Si tawii laamateeri liddondirii kayri tigi, haray ndin laamateeri waawataa tabitude. ²⁵ Awa kadi si suudu liddondirii, ndun suudu waawataa tabitude. ²⁶ Si tawii non Ibuliisa dartike hoore mun tigi, o liddike hoore makko, haray o waawataa tabitude, haray fii makko lannii. ²⁷ Ko fii hay gooto waawataa naatude e nder galle neddo dolnudo, o mooba keyeeji on din, ado o haßbude on neddo dolnudo. Ko onsay doo o waawata moobude ko woni ka suudu on kon. ²⁸ Ka haqiqiqa mi andinii on, yimbe ɓen yaafante junuubaaji din fow e

hoyreeji dì bë hoynata din,²⁹ kono kala hoynudo *Ruuuhu Seniido on hebataa yaafuyee few, haray himo fawtii junuubu haa poomaa.»³⁰ Ko Iisaa wi'iri bë dñun, ko bëay hibe wi'ude: «Jinna no e makko.»

Fii Beynguure Iisaa nden

(Mat. 12.46-50; Luk. 8.19-21)

³¹ Onsay yumma Iisaa e yumma-gootooëbe makko bëen ari, darii ka yaasi. Be immini godđo ko noddana bë mo. ³² Tawi jamaa on no joodii, hundi mo, bë wi'i mo: «Yumma mon e yumma-gootooëbe mon bëen no darii ka yaasi, hibe dabbitude on.»

³³ Iisaa jaabii bëe, o wi'i: «Ko hombo woni yumma an e yumma-gootooëbe an bëen?»³⁴ Onsay o layyí gite e hoore joodiibëe hundi mo bëen, o wi'i: «E hino yumma an e yumma-gootooëbe an bëen. ³⁵ Ko fii kala wadudo faale Alla on, haray ko on woni yumma-gooto an on e bandiraawo an on e yumma an.»

Misal Yettaangal e Remoowo

(Mat. 13.1-23; Luk. 8.4-15)

4 ¹ Iisaa woni kadi e waajagol ka daande weendu. Hakkee ko jamaa moobinoodo takko makko on duudi, o bakii e laakun ka nder weendu, o joodii, jamaa on fow woni ka daande weendu. ² O janniri bë piiji buy mise. E nder ko o waajotoo kon, o wi'i:³ «Hedee, ko remoowo yaltunoo sankugol. ⁴ E nder ko o sankata kon, gabbe goo yani ka datal, colli din ari modi de. ⁵ Godđe den yani e hoore kaaye, ka leydi duudaa, de fudi heja sabu dewlugol leydi ndin. ⁶ Bay naange ngen yaltii, de sumi de yoori sabu angal ka dadì din sijoo. ⁷ Godđe goo kadi yani ka soyoore, de fudidi e mayre, soyoore nden modi de, laatii de rimaali few. ⁸ Godđe goo yani ka leydi moyyiri. De fudi, de mawni, de sawti, cawti goo gabbe cappande tati, cawti goo cappande jeegoo, cawti goo teemedere.»

⁹ E hoore dñun, o wi'i: «Mo no mari noppí nanirdí yo nanu!»

¹⁰ Bay lutii mo kanko tun, dowtunoobe mo 6en e *sahaabaabe sappoo e didoobe 6en woni e landagol mo firo dee mise. ¹¹ O wi'i be: «Onon on yedaama gundoo *laamu Alla ngun, kono bee ka yaasi, 6e wowlirante fow mise, ¹² fii yo 6e ndaaru, hara 6e yi'ataa, yo 6e nanu, hara 6e faamataa, fii wota 6e tuubu, junuubaaji mabbe din yaafee.»^b

¹³ O wi'i 6e kadi: «On faamaali ngal misal doo? Ko honno non faamiroton deya mise fow? ¹⁴ Remoowo on sanki awdi ndin, dñun ko daalol ngol. ¹⁵ Wobbe no wa'i wa nde awdi sankaa ka datal ka daalol ngol sankaa don. Be nana ngol tun, Ibuliisa ara, itta daalol sankaangol e mabbe ngol. ¹⁶ Wobbe goo kadi no wa'i wa nde awdi sankaa ka kaaye. Nde 6e nani daalol ngol, 6e jaba ngol heja e nder weltaare.

¹⁷ Kono 6e alaa dadi, ko fii hinaa 6e tabitube. Nde satteendeeji maa cukkeede aroyi sabu jokkugol mabbe daalol ngol, 6e tertoto kisan. ¹⁸ Wobbe goo kadi no wa'i wa nde awdi sankaa ka sooyoore. Ko ben woni nanoobe daalol ngol, ¹⁹ kono ngol ronka rimude e mabbe, ko fii haray ngol modiraama anndeeji aduna e dayniro jawle e faaleeji ngurndan goo. ²⁰ Beya 6en non no wa'i wa nde awdi sankaa ka leydi moyyiri. Ko ben woni nanoobe daalol ngol, jaba, ngol rima e mabbe, wobbe goo laabi cappande tati, wobbe goo laabi cappande jeegoo, beya 6en laabi teemedere.»

Misal Yettaangal e Lampu

(Luk. 8.16-18)

²¹ O wi'i 6e kadi: «Taw si hara lampu ko ka wirnii wadetee maa ko e ley danki? E hara hinaa ka kene? ²² Ko fii alaa ko suudii ko feenataa, awa kadi kala gundoo ko sakkitorta ko feenugol. ²³ Mo no mari noppí nanirdí yo nanu!»

^b4.12 Isa. 6.9-10

²⁴ O wi'i 6e kadi: «Wattanee yiila e ko hedotodon kon. Ko fii ko sariyaare nde etirdon nden etirantedon, beyditanedon kadi. ²⁵ Ko fii ko mardo beydantee, kono mo maraa on jabitante hay y eru ko o mari kon.»

Fii no Laamateeri Alla ndin Ebbindiriraa e Awdi

²⁶ O wi'i 6e kadi: «Laamu Alla ngun no wa'i wa nde neddo yetti awdi, sanki ka leydi. ²⁷ Woni o daanii woo, o daanaaki woo, jemma e jalorma awdi ndin fuday, njanda, hara ko no o andiraa. ²⁸ Leydi ndin fudinanay hoore mun, ndi adora pudol ngol, hikka cawtol ngol, si gabbe den kadi moyyinoo moyya ka cawtol. ²⁹ No gabbe den bendifiri, wortowal ngal no yetteede, ko fii haray baagol ngol fewndike.»

Fii no Laamateeri Alla ndin Ebbindiriraa e Bene

(Mat. 13.31-32; Luk. 13.18-19)

³⁰ O wi'i kadi: «Ko hondun ebbindirten e laamu Alla ngun, maa ko misal hongal hollirten dun? ³¹ Hingu wa'i wa abbere bene, kon ko buri fandude e ko aawetee kon fow ka leydi. ³² Kono si wonii nde aawaama, nde hawtoo, nde njanda, nde bura ko aawetee e naakoo kon fow, nde wada caldi njani haa ka tawata colli din ka weeyo waaway hodude ka ley dowdi makki.»

³³ Ko mise buy wa'itaynoode nii o yewtiraynood 6e daaluyee on, noone no 6e waawiraynood faamirde. ³⁴ O yewtirtaano 6e si wonaa mise, kono si wonii ka weddii o sifantono fow taalibaabe makko ben.

Fii no Iisaa Deeyiniri Waabiliire nden

(Mat. 8.23-27; Luk. 8.22-25)

³⁵ Nden nande kiikiide Iisaa wi'i 6e: «Lumbiten gada.»³⁶ Be acciti jamaa on, 6e nabori Iisaa ka weendu e nder laakun kun o wonnood e mun kun, laadee goo dowti 6e. ³⁷ Tun waabiliire tiidunde wondunde e hendu woni e wifugol, tawi morloode ndiyan den no piyoo e laakun kun, kun heewa ndiyan. ³⁸ Tawi kanko Iisaa himo

awlii ngawlu, daanii ɓaa wo. Be findini mo, ɓe wi'i: «Karamoko'en, e on kippataa fii ko men woni mulude kon?»

³⁹ O immii, o tonjani hendlu ndun, o wi'i ndiyan dan: «Deeyu, fankaal!» Hendlu ndun dey়i, deeyango tiidungo wadi. ⁴⁰ E hoore dun o wi'i ɓe: «Ko fii hondun hulandon? E hara on alaa gomdinal haa jooni?»

⁴¹ Be huli kulol tiidungol, ɓe wi'indiri: «Ko hombo woni oo? Ko fii hay keneeli din e baharu on doftoto mo!»

Fii no Jinnanoobe Dido Selliniraa

(Mat. 8.28-34; Luk. 8.26-39)

5 ¹Be hewtoyi gada weendu ndun, dun ko e ndii leydi ɓee Gadariyankoobe. ²Nde Iisaa tippornoo ka laana, aaden mo jinna woni e mun iwri ka genaale, ari yeeso makko. ³Tawi ka on mari hodo ko ka genaale. Hari hay gooto waawataa mo habbude hande kadi, hay si tawii non ko jolokooje. ⁴Ko fii hari soono woo o dumbete, o jolkee, o taya jolokooje den, o hela dumbirde den. Tawi hay gooto waawataa mo dahude. ⁵Tawi jemma e jalorma ko ka genaale e ka pelle o tabiti, e himo sonka, barmintinora kaaye.

⁶No o haccornoo Iisaa ka woddi, o dogi, o ari, o jicci yeeso makko, ⁷o ewnii ko tiidi, o wi'i: «Ko hondun faalanadaa lan, an oo *Biddo Alla Jom Bural? Mi torike ma fii Alla, wota a lettan!»⁸ Ko fii hari Iisaa no wi'ude ngii: «Yaltu e oo neddo, yo jinnawii!»

⁹ Onsay Iisaa landii mo: «Ko honno innetedaa?»

On jaabii: «Ko 〈Konu〉, ko fii meden duudi!»¹⁰ Awa kadi hidji jeejaynoo mo fota fii wota o yaltin di leydi ndin.

¹¹ Tawi wuro kose moolanaango no ooraynoo ka binde falo don. ¹² Onsay jinnaaji din jeeji Iisaa, hidji wi'a: «Nawru men e dii koseeji fii no men naatira e nder majji!»¹³ O newnani di dun. Jinnaaji din yalti e on neddo, di naati e nder din

koseeji. Onsay koseeji din giddi ka falo, di unoyii ka weendu, di yoolii, tawi ko wa di guluuji didi.

¹⁴Onsay ornaynoobe di ben dogi, be fillitoyii dun ka saare e ka fulawaaji, yimbe ben ari yi'ugol kon ko wadi. ¹⁵Bay be arii e Iisaa, be yi'ii on mo konu jinna wonnoo e mun no joodii bornii, wondi e hakkille timmude, be huli. ¹⁶Yi'unoobe ko wadi kon fillitanii be ko wadi e hoore jinnanoodo on kon e ko wadi e koseeji din kon. ¹⁷Onsay be woni e jeejugol Iisaa fii yo o yaltu ka leydi mabbe.

¹⁸Wa ko kanko Iisaa o yawata ka laana, jinnanoodo on torii mo yo o accu be wonda. ¹⁹Laatii Iisaa newnanaali mo, kono o wi'i mo: «Yahu ka mon, dun ko ka sibbe maa ben, fillitanodaa be ko Joomiraado on wadan-maa kon fow e ko honno o yurmira-maa.»²⁰Onsay o yahi, o woni e fillitagol e nder *Dekapooli ko Iisaa wadani mo kon fow. Hediibe mo ben fow ŋaldi.

Fii no Iisaa Wurnitiri Jiwo, O Sellini Debbo

(Mat. 9.18-26; Luk. 8.40-56)

²¹Bay Iisaa yetti laana kan, lumbitoyii gada, jamaa moolanaado ari, moobii takko makko kadi ka daande weendu. ²²Tun goddo e hooreebé juulirde nden wi'eteedo Yaayirusu, ari. Bay o yi'ii mo, o yani e ley koyde makko. ²³O torii mo, o jeeji e hoore himo wi'a: «Biddo an jiwo on no e daande mayde. Seenee fawon sookeeje mon den e makko fii no o dadira, o wuura.»²⁴Onsay Iisaa yaadi e makko.

Jamaa duududo jokki mo, bittiri mo cende den fow. ²⁵Tawi kadi debbo no don, hebii duubi sappoo e didi himo soncaade. ²⁶Tawi o tampii fota e juude jawndoobe duudube, awa kadi o ittii ko o jogii fow, dun nafaali huunde, kono jaw ngun burtu. ²⁷Bay o nanii fii Iisaa no wowlee, o ari e jamaa on, o wontiri baawo Iisaa, o meemi dolokke makko on, ²⁸ko fii hari kanko debbo on himo mijjoo: «Si mi waawii tun meemude conci makko din, mi ndikkay.»²⁹E on saa'i tigi ko o soncotonoo kon tayi, o andi ka bandu makko wonde o ndikkii jaw makko ngun.

³⁰Tun Iisaa andi wonde bawgal makko ngal gollii godsdun. O yeypyitii e hakkunde mbatu ngun, o wi'i: «Ko hombo meemi conci an din?»

³¹Taalibaabe makko ben wi'i mo: «Ndaaree jamaa ko bitti on, si hidon maaka <ko hombo meemi lan?»»

³²Onsay o layyi gite takko makko fii yo o yi'u wadudo dun on. ³³Nde tawnoo debbo on no andi ko feyyi e makko kon, o huli, o diwni, o ari o yani e ley koyde Iisaa, o wowlani mo goonga on fow. ³⁴Kono Iisaa wi'i mo: «Jiwo an, gomdin maa ngal sellinii ma. Yahu e hoore buttu, sellaa naw ngu wondudaa ngun.»

³⁵Wa fewndo ko Iisaa yewtata dun, wobbe e jeyaabe ka hooreejo juulirde nden iwi ton ari, wi'i mo: «Jiwo maa on maayii. Ko fii hondun sonjantaa oo karamokoojo?»

³⁶Kono bay Iisaa nanii dun, o wi'i hooreejo juulirde nden: «Wota a hulu, gomdin tun.»

³⁷Kono laatii Iisaa jaabaano hay gooto dowta mo, si hinaa Petruusu e Yaaquuba e Yuuhanna neene-gooto Yaaquuba on. ³⁸Bay be hewtii ka hooreejo juulirde nden, kanko Iisaa o yi'ii jiiboldu ndun e ko yimbe ben wullata fesa ko tiidi kon. ³⁹O naati, o wi'i be: «Ko hondun woni nduu jiiboldu e dii gondi? Ko fii jiwo on maayaali, o daani.»⁴⁰Be jali mo.

Onsay o yaltini be fow, o yetti ben jiwo on e yumma jiwo on, wondude e dowtunoobe mo ben, be naati ka jiwo on woni don. ⁴¹O nangi jungo jiwo on, o wi'i mo: «Talitaa kumi!» (ko woni firo dun: «Mi wi'ii ma: <Jiwo, immo!>») ⁴²Don kisan jiwo on immii, o woni e jindugol, ko fii hari ko mo o duubi sappoo e didi. Kaawee mawdo hebi be. ⁴³Iisaa yamiri be, tentini, wota hay gooto andu dun. O wi'i be yo be okkor jiwo on ko o jaama.

Fii no ɓe Naasirata ɓen Salori Gomdinde Iisaa

(Mat. 13.53-58; Luk. 4.16-30)

6 ¹Onsay Iisaa iwi don, o yahi ka leydi makko. Taalibaabe makko ɓen kadi jokki mo. ²Bay wonii *nalaande fowteteende nden hewtii, dun ko *aseweere nden, o woni e waajagol ka juulirde. Tawi duudube no hedotonoo mo. Be ɣaldi, ɓe wi'i: «Dun ko honto iwrani oo? Ko hongu woni ngui faamu ngu oo yedaa, e ko honno sifa dii kaawakeeji moyyí woni wadirde e juude makko? ³E hinaa minisiyeejo on nii? Hinaa kanko woni biddo Mariyama on? E hara neene-gootoobe makko ɓen hinaa Yaaquuba e Yuusufu e Yuudu e Sim'uunu? E hinaa bandiraabe makko ɓen no wondi e men doo?» Dun hadi ɓe gomdingol mo.

⁴Kono Iisaa wi'i ɓe: «Annabaajo ko ka leydi mun tun e ka musidal mun e ka ɓeynguure mun yawaa.»⁵ Laatii o waawaali wadude don kaawake woo, si hinaa *fawugol juude e hoore nawnube goo, sellina ɓe. ⁶Kono o ɣaldi sabu angal gomfinal mabbe ngal. O jindi e kodooli hundudi don din, o janni.

Fii no Iisaa Nulirnood Sahaabaabe mun ɓen Sappoo e Dido

(Mat. 10.2-20; Luk. 9.1-6)

⁷ Onsay o noddi sappoo e didoobe ɓen, o woni ɓe e imminirgol dido dido e hoore jonnugol ɓe bawgal radagol jinnaaji din. ⁸E hoore dun, himo yamiri ɓe wota ɓe yettu hay huunde ko ɓe yooboo, si hinaa tuggordu wooturu tun: hinaa bireedi, hinaa bonfooji, hinaa yettugol dattol mbuudi. ⁹Kono o wi'i ɓe: «On wattoto pade, kono wota on borno dolokkaaji didi.»¹⁰ O wi'i ɓe kadi: «Kala suudu ndu naatoydon e mun, weeree don haa nde hidon iwa e nden nokkuure woo. ¹¹Kono si woodii e saare nde yimbe ɓen jabaali on, hedii on, nde hidon yalta don woo, honkee mbullaari teppe mon den fii yo dun wonan ɓe seedee ella mabbe on.»

¹² Be yahi ɓe waajoyii fii yo yimbe ɓen tuubu. ¹³Tawi hibe radoo jinnaaji duududi, juura nebbe e jawbe duudube, sellina ɓe.

Fii Mayde Annabi Yaayaa nden

(*Mat. 14.1-12; Luk. 9.7-9*)

¹⁴ Heroodu* lando on humpitii dun. E hoore dun tawi innde Iisaa nden lollii, hibe wi'a: «Yaayaa lootaynoodo maande tuubuubuyee on immitike e hakkunde maybe ben! Ko dun wadi si himo mari bawgal wadugol kaawakeeji moyýi.»

¹⁵ Tawi wobbe ben no wi'a wondema ko liliya, beya ben kadi no wi'a ko annabaajo wa goddo e annabaabe hibbe ben.

¹⁶ Kono bay Heroodu nanii dun, tawi himo wi'a: «Ko Yaayaa, on mo mi wadi haa daande mun tayaa. Ko on woni ko immitii!»

¹⁷ Ko fii hari kanko Heroodu tigi o nangiino Yaayaa, o jolkii mo, o wadii e kaso, sabu oo debbo wi'eteedo Heroodiiya mo kanko Heroodu o yetti, tawi-le on ko beyngu Filiipu, yumma-gooto makko on nun kanko Heroodu, ¹⁸ sabu ko Yaayaa wi'unoo mo kon wonde daganaaki mo ka o yetta beyngu yumma-gooto makko on. ¹⁹ Tawi oo debbo wi'eteedo Heroodiiya no haamanii mo kanko Yaayaa, no faalaa mo warude, kono o waawaali, ²⁰ ko fii hari Heroodu no huli Yaayaa, sabu ko o andi kon on ko neddo feewudo laabudo, jaka himo hiwunoo mo. Tawi himo yidunoo hedagol mo, fii kala si o nanii himo yewta, o jibotonu fota.

²¹ Kono nande goo kanko Heroodiiya o hebi sabu weebando mo e nder ngal caatal, ngal Heroodu wadani be o lammini ben e hooreebe suufaabe makko ben e hooreebe ben Jaliilu fii anditugol jibineede makko kanko Heroodu ngol. ²² E nder dun, jiwu Heroodiiya on naati, ami, o weli Heroodu e saatinaabe ben.

Onsay lando on wi'i jiwu on: «Toro lan kala ko faaladaa, mi wadante.»²³ O wadani mo ndee woondoore doo, o wi'i: «Kala ko toridaa mi, mi wadante, hay si ko feccere laamateeri an ndin.»

²⁴ Kanko jiwu on o yalti, o landii yumma makko: «Ko hondun mi landotoo?»

Neene makko jaabii mo wi'i: «Ko hoore Yaayaa lootoowo maande tuubuubuyee on.»

²⁵ Kanko jiwon o hawjiti kisan, o naati, o ari e lando on, o wi'i: «Mido faalaa yo a jonnana doo hoore Yaayaa lootoowo on kisan, hara hinde tumbaa e miran!»

²⁶ Onsay lando on aani, kono sabu woondooje makko den, e be o saatinnoo ben, tawi o faalaaka mo salanaade. ²⁷ O immini kisan suufaajo, o yamiri mo addoygol hoore Yaayaa nden. Suufaajo on yahi, tayoyi hoore Yaayaa nden ka kaso, ²⁸ o addi hoore nden e nder miran, o jonnajiwo on. Jiwo on kadi jonnysi nde yumma mun.

²⁹ Bay wonii dün andike, taalibaabe Yaayaa ben ari, yetti furee makko on, be surroyi.

Fii no Iisaa Namminiri Yimbe Guluuje Njowo

(Mat. 14.13-21; Luk. 9.10-17; Yhn. 6.1-14)

³⁰ Sahaabaabe* ben mottondiri takko Iisaa, be sifanii mo ko be wadi kon fow e ko be janni kon. ³¹ Onsay o wi'i be: «Aree ka weddii, hara ko ka wuldiini, fowtodon seeda.» Ko fii hari yimbe buy no wada yaha ara, tawi Iisaa e taalibaabe mun ben alaa hay feere no be jaamira.

³² Onsay kambe tun be bakii e laana fii yahugol e nokkuure wuldinnde. ³³ Buy yi'i hibe yaha, anditi be. Yimbe ben ka ca'e fow dogi, aditoyii be ka be yahaynoo ton.

³⁴ Bay wonii kanko Iisaa o tippike ka laana, o yi'i jamaa diuududo, o yurmaa be, ko fii hari hibe wa'i wa baali di alaa ngaynaako. Onsay o woni be e jannugol piiji duudsudi.

³⁵ Nde tawnoo nallal ngal poodike, taalibaabe makko ben badii mo wi'i: «Ndee nokkuure ko wuldinnde, awa kadi nallal ngal poodike. ³⁶ Accitee be, be yaha ka fulawaaji e ka kodooli kawtirdi e doo, be dabboya ko be jaama.»

³⁷ Iisaa jaabii be wi'i: «Onon tigi okkoree be ko be jaama.»

Kono ɓe wi'i mo: «E hara men yahay, men soodoya bireedi yeru *dinaruuji teemedde didi, men okkora ɓe ko ɓe jaama?»

³⁸ Onsay o jaabii ɓe, o wi'i: «Ko bireedijje jelu mardon? Yahee ndaaroyon.» Be yahi, ɓe humpitoyii, ɓe ari, ɓe wi'i mo: «Ko bireedijje jowi e liy়ি didi.»

³⁹ Onsay o yamiri ɓe yo ɓe joddinir ɓe fow mojobe mojobe ka hoore hudo hecco.

⁴⁰ Be joddiniri ɓe safeeji safeeji, di yimbe teemedere, e di yimbe cappande njowo. ⁴¹ O yetti bireedijje den jowi e liy়ি din didi, o banti gite den, o fewtini ka kammu, o du'ii. Onsay o tayiti bireedi on, o woni e jonnugol taalibaabe ben ko hewtina jamaa on. O senditi kadi liy়ি din e hakkunde fow. ⁴² Fow jaami haa haari. ⁴³ Be moobiti debeeje sappoo e didi tew kunte bireedi e liy়ি. ⁴⁴ Ben jaamunoobe on bireedi hari ko ɓe worbe guluuje njowo.

Fii no Iisaa Seppiri ka hoore Ndiyan

(Mat. 14.22-33; Yhn. 6.16-21)

⁴⁵ Bawto dun kisan, o yamiri taalibaabe makko ben yo ɓe bako ka laana, ɓe hikkoo yeeso makko, ɓe lumba gada, telen Bayti-Sa'iida, e nder ko o yiltata jamaa on kon. ⁴⁶ Bay o waynondirii e mabbe, o yawi ka fello fii toragol Alla.

⁴⁷ Bay nibbii, tawi laana kan no ka tumbo weendu, kanko Iisaa tun himo ka leydi. ⁴⁸ O andi hibe e nder satteende fota e nder awy়ingol laakun kun, ko fii hari hibe tiindondiri e hendu ndun. Wa fewndo ka subaka, o sutori e mabbe, himo seppa ka hoore ndiyan, tawi himo faalaa ɓe feyyitaade. ⁴⁹ Bay taalibaabe ben yi'ii himo seppa ka hoore ndiyan, ɓe sikki ko mbeelu, ɓe sonki, ⁵⁰ ko fii hari ɓe fow be yi'ii mo, ɓe hulii.

Iisaa wi'i ɓe kisan: «Hoolee, ko min nii! Wota on hulu!»⁵¹ Onsay o yawi ka laana takko mabbe, hendu ndun dey়iti. Be fow ɓe ɣaldı fota, ⁵² ko fii hari ɓe faamaali kaawake moy়o wadudo on ka bireedijje, bay hari ferde mabbe den no uddi.

⁵³ Bay ɓe gaynii lumbude weendu ndun, ɓe hewtii Jaani-Saarata, ɓe saani laana kan. ⁵⁴ Bay ɓe tippike ka laana, yimbe ɓen anditi kisan Iisaa. ⁵⁵ Be dogi e diiwal ngal fow, ɓe woni e addangol mo nawnube e hoore boggi-dimbordi, kala ka andanoo himo don. ⁵⁶ Kala ka o naatunoo, woni ka kodooli, woni ka ca'e maa ka fulawaaji, ɓe addayno nawnube ɓen ka fottirde, ɓe jeeja mo yo o newnan ɓe tun ɓe meema kombol dolokke makko on. Meemunoobe ngol ɓen fow ndikki.

Fii Fariisiyaabe ɓen e Aadaaji mun din

(Mat. 15.1-9)

7 ¹ Onsay *Fariisiyaabe ɓen e wobbe e jannoobe fii Sariya on, iwrunoobe Yerusalaam, moobii takko Iisaa. ² Be yi'i wobbe e taalibaabe makko ɓen no jaamira juude tuunude, e maanaa de soodaaka. ³ (Tawi-le Fariisiyaabe ɓen e *Yahuudiyankeebé ɓen fow jaamataano si soodaaki haa laabi, ko fii hibe jogitinoo naamuji mawbe mabbe ɓen. ⁴ Si ɓe iwtiino ka fottirde, ɓe naamiino woo nde ɓe labbinii. Hibe joginoo kadi naamuji buy ci ɓe wadaynood, wano lawyugol jardukoy koy e payande den e miranji din.)

⁵ Onsay Fariisiyaabe ɓen e jannoobe fii Sariya on landii mo kanko Iisaa, ɓe wi'i: «Ko hondun hadi taalibaabe maa ɓen jokka naamuji mawbe ɓen? E ko fii hondun ɓe jaamata, hara ɓe soodaaki?»

⁶ Iisaa jaabii ɓe wi'i: «Isaaya* no haalunoo ko Alla longini mo fii mon moyfa, yo faasiqiibe, wano windori non:

«Oo jamaa ko ka toni mun woni lan mawninde,
kono berde mabbe den no woddondiri e an fota.

⁷ Ko e nder meere ɓe woni lan rewude,
janndeeji ci ɓe woni jannude din
ko ci yimbe ɓen sinci.»^c

^c7.7 Isa. 29.13

⁸ «Hidon tertaade yamirooje Alla den, jogitoo naamuucci yimbe ben.»

⁹ O beyditi, o wi'i: «Hidon bugitoo few yamirooje Alla den fii huutorgol naamuucci mon din, ¹⁰ ko fii Muusaa no wi'i: ‹Teddin yumma maa e ben maa›, awa kadi: ‹on mo hudi ben mun maa yumma mun donkinirte mayde.› ¹¹ Kono onon hidon wi'a goddo no waawi wi'ude ben mun maa yumma mun: ‹Mi yedii Alla ko mi nafiraynoo on kon.› ¹² E nder wi'ugol mon dun, on accataa ontigi wadana ben mun maa yumma mun hay huunde han kadi. ¹³ Ko nii wondon mehindinirde daaluyee Alla on tippude e naamu mon mo sincanadon on. Hidon wada kadi piiji duusudu goo nandudi e mun!»

Fii ko Tuuninta Neddo kon

(Mat. 15.10-20)

¹⁴ Isaa nodditi kadi jamaa on, o wi'i be: «Hedee lan on fow, faamon. ¹⁵ Hay huunde alaa e kene naataynde e neddo, tuunina mo, kono ko ko yaltata e neddo kon tuuninta mo. ¹⁶ Mo no mari noppi nanirdi yo nanu!»

¹⁷ Bay wonii o naatoyii e suudu ka wodditii jamaa on, taalibaabe makko ben landii mo fii ngal misal. ¹⁸ O wi'i be: «E jaka, onon kadi ko on be alaa faamu? E on andaa hay huunde alaa e kene naataynde e neddo, waawaynde tuuninde mo? ¹⁹ Ko fii dun naatataa ka bernde makko, kono ko ka reedu makko yaarata, dun yaltinoyee ka baawo.» (Tawi ko o wi'i don ko wonde jaameteeji din fow no laabi.)

²⁰ O wi'i kadi: «Ko ko yaltata e neddo kon woni ko tuuninta mo, ²¹ ko fii, ko e nder bernde neddo mijooji bondi yaltata, kajun e cagayaagal e nguyka e waru-hoore e ²² jeeno e miile e hunyeendi e janfa e jiibaare e nawliigu e hoyre e mawnintinaare e njofoyaagal. ²³ Dii piiji bondi fow ko yaltaydi e nder neddo, tuunina mo.»

Fii no Gomdinal Debbo Feniisiyankeejo Bangiri

(Mat. 15.21-28)

²⁴ Bay kanko Iisaa o iwii e nden nokkuure, o yahi e ndii leydi ndee saare Tiiri. O naati don e suudu, tawi o yidaa hay gooto anda. Kono o waawaali suudaade, ²⁵ ko fii hari debbo mo tawata jinna no nangi biddo mun jiwo, naniino fii makko kanko Iisaa no wowlee, o ari, o yani e ley koyde makko. ²⁶ Tawi on debbo ko

*Gereekiyantee, mo iwdi mun woni Fenisi, dun ko e nder Sirii. O torii mo radanagol mo jinnawii wongii e jiwo makko on ngin.

²⁷ Iisaa wi'i mo: «Accu taho faybe 6en haara, ko fii moyyaa ka bireedijje paykoy koy yettee, buganee bareeji din.»

²⁸ Debbo on jaabii mo: «Hiiyii, Koohoojo, kono hay bareeji wondi ka ley taabal din jaamay ko paykoy koy samminta kon.»

²⁹ Onsay kanko Iisaa o wi'i mo: «Sabu ngol kongol, yahu, jinnawii ngin yaltii e jiwo maa on.»

³⁰ Bay wonii kanko debbo on o naatoyii ka suudu makko, o tawi biddo makko jiwo on no waalii ka danki, awa kadi jinnawii ngin yaltii e makko.

Fii no Iisaa Selliniri Pahidudo-Mbobidi

³¹ Onsay Iisaa iwi e ndin leydi Tiiri, o tayiti leydi Siduuna ndin, o artiri

*Dekapooli telen ka *Weendu Jaliilu. ³² Be addani mo pahidudo-mbobidi, be jeeji mo *fawugol juude den e hoore on, sellina mo. ³³ O nabi mo sera, ka wodditii jamaa on, o ukki kolli makko din ka nder noppi nawnudo on, o tutti, o meemini denngal on ngal. ³⁴ Onsay o banti gite makko den, o fewtini ka kammu, o tayiti foofaango, o wi'i: «Efataal!» (Dun no firi: «Uddito!») ³⁵ Tun kisan noppi makko din udditii, denngal makko ngal kadi bowri, o woni e wowlugol no feewiri.

³⁶ Iisaa yamiri be wota be wowlan dun hay gooto, kono, ko no o hadirnoo be woo, be burtiraynoo lollinirde. ³⁷ Be woni e nder ȳalaw tiidudo, be wi'i: «Ko o

wadata kon fow ko ko moyýi. O naninay hay pahidubé ben, o wowlina kadi mbobidubé ben!»

Fii no Iisaa Namminiri Yimþe Guluuje Nayo

(Mat. 15.32-39)

8 ¹E ðen balde ðon, nde tawnoo jamaa moolanaado kadi no ðon, awa kadi alaa ko ðe jaama, Iisaa noddi taalibaabe mun ðen, o wi'i: ²«Oo jamaa no yur mammi, wonii nii balde tati hibe wondi e an, ðe alaa ko ðe jaama. ³Si mi yiltii ðe ka mabbe hibe weelaa, ðe lo'ay ka laawol, ko fii wobbe e mabbe ko ka wodði iwi.»

⁴Kono taalibaabe makko ðen jaabii mo, wi'i: «Ko honto men hebata bireedi e ndee nokkuure wuldinnde ko haarata bee?»

⁵Iisaa landii ðe, wi'i: «Ko bireedijje jelu mardon?»

Be jaabii mo, ðe wi'i: «Ko de jeedidi.»

⁶Onsay o torii jamaa on joodagol ka leydi, o yetti bireedijje ðen jeedidi. Bay o jarnii Alla, o tayiti, o jonni taalibaabe makko ðen fii yo ðe hewtin jamaa on, kambe kadi ðe hewtini. ⁷Tawi hibe marnoo kadi liyyi seeda. Dun kadi, bay Iisaa gaynii du'aade, o wi'i yo ðe hewtin ðe. ⁸Be jaami haa ðe haari, moobitaa debeeje jeedidi tew ko lutti. ⁹Tawi ðen ko wa ðe worbe guluuje nayo. Bawto dun Iisaa yilti ðe. ¹⁰Ontuma o bakodi e taalibaabe makko ðen e laana ndiyan, o yahi e ndii leydi Dalmanuuta.^d

Fii no Iisaa Tororaa Hollugol Maande

(Mat. 16.1-4)

¹¹Onsay *Fariisiyaabe ðen ari, fuddii yeddondirde e Iisaa. Be landii mo fii ndarndagol mo, yo o hollu ðe maande iwrunde ka kammu. ¹²Iisaa tayiti foofaango tiifungo, o wi'i: «Ko fii hondun nguu jamaanu landorta maande? Ka haqiqiqa mi

^d8.10 «Dalmanuuta» no wi'ee kadi «Magaduuna».

andinii on, nguu jamaanu jonnaake maande.»¹³ Onsay o acci ɓe don, o bakii kadi e laana fii lumbugol gada.

Fii «Lewen» Fariisiyaabe ben e mo Heroodu Lando on

(Mat. 16.5-12)

¹⁴ Laatii taalibaabe ben yejiti yettorde bireedi, tawi ko bireediwal gootal pet ɓe mari ka nder laana. ¹⁵ Iisaa yamiri ɓe dundoo, o wi'i: «Reenee fota e lewen Fariisiyaabe ben e lewen *Heroodu on.»

¹⁶ Taalibaabe ben wi'indiri: «Ko o wi'iri dun, ko fii en maraa bireedi.»

¹⁷ Iisaa andi ko ɓe wi'i kon, o wi'i ɓe: «Ko fii hondun wi'andon ko ɓay on maraa bireedi? E on andaali, e on faamaali kadi? E hara berde mon den sattii? ¹⁸ Hidon jogii gite, e hara on yi'ataa? Hidon mari noppi, e hara on nanataa? ¹⁹ Fewndo mi tayiti bireedijje den jowi fii yimbe ben guluuje njowo, e on anditaali ko debeeje jelu heewude tew kunte bireedi artirnodon?»

Be jaabii mo: «Ko de sappoo e didi.»

²⁰ «Bay kadi mi tayitii bireedijje den jeedidi fii yimbe ben guluuje nayo, ko debeeje jelu tew kunte bireedi artirnodon?»

Be jaabii: «Ko de jeedidi.»

²¹ O wi'i ɓe kadi: «Hara on faamaali haa jooni?»

Fii no Iisaa Wuntiniri Bundo goo Bayti-Sa'iida

²² Bawto dun ɓe yahi Bayti-Sa'iida. Be addani mo bundo, ɓe jeeji mo yo o meemu mo fii yo o sellin mo. ²³ Onsay o jogii jungo bundo on, o nabi mo ka baawo hodo. O wadi tuuta ka gite on, o *fawi juude makko den e hoore makko, o landii mo, o wi'i: «Hida yi'ude godfun?»

²⁴ O banti gite den, o wi'i: «Mido haccaade yimbe, kono mido yiirude ɓe wa ledde wonde yahude.»

²⁵ Iisaa waditi kadi juude den ka gite makko. Bundo on ndaari tenyini, o ndikki, o yi'i fow ko laabi. ²⁶ Onsay Iisaa immintini mo yo o hootu ka makko e hoore himo wi'a: «Wota a naatu ka hodo.»

Fii Qirritannde Petruusu nden

(Mat. 16.13-20; Luk. 9.18-21)

²⁷ Nde Iisaa naatunoo e kodooli Seezariiya-Filiipu din, o landii taalibaabe makko ben ngal landal doo, o wi'i: «E wi'i yimbe ben, ko hombo woni lan min?»

²⁸ Be jaabii mo: «Wobbe no wi'a ko onon woni Yaaya lootaynoodo on, wobbe kadi no wi'a ko onon woni Iiliya, wobbe goo kadi no wi'a ko on goddo goo e annabaabe ben.»

²⁹ O landii be kadi, o wi'i: «Onon non wi'udon ko hombo woni lan min?»

Petruusu jaabii mo, wi'i: «Ko onon woni *Almasiihu on!»

³⁰ Iisaa yamiri be, tentini, wota be wowlan hay gooto ko hombo woni mo.

Fii Tampereeji Iisaa din e Artugol makko ngol

(Mat. 16.21-28; Luk. 9.22-27)

³¹ Onsay o fuddii be jannude wonde bee *Bii-Aaden on tampa fota, awa kadi mawbe ben e hooreebe *yottinoobe sadaka ben haa nabani jannoobe fii Sariya on wikkoyto mo, o waree, o immintinoyee ka jalaande tammere. ³² Tawi ko no laabiri o yewtata dii piiji. Petruusu pottini mo sera, o woni mo e felugol.

³³ Kono Iisaa yeýitii, o ndaari taalibaabe makko ben, o feli Petruusu, o wi'i mo: «Yilto baawo an, yo Ibuliisa, ko fii mijooji maa din hinaa di Alla, kono ko di yimbe ben!»

³⁴ Onsay o noddi jamaa on e taalibaabe makko ben, o wi'i be: «Kala faalaado jokkude lan, yo o hayfintino, o yetta *leggal makko altindiraangal ngal,^d o

^d8.34 «Yettugol leggal mun altindiraangal ngal» ko hebilagol jokkugol Iisaa haa maaya.

jokkammi.³⁵ Kala faalaado dandude ngurndan mun, dan hayriray mo, kono kala non mo ngurndan mun hayrira sabu an min e Kibaaru Moyyo on, haray ontigi dandoyay dan.³⁶ E ko nafa hondun woodani neddo hebugol aduna on fow, hayra wonkii mun kin?³⁷ Maa ko hondun neddo ittata fii sottugol wonkii mun kin?

³⁸ Awa kadi, kala hersirđo lan, hersiri kongudi an din e hakkunde oo jamaa jinoowo wada junuubi, Bii-Aaden on kadi hersiroay mo tuma o ardoi e mangural Ben makko ngal wondude e malaa'ikaabe laabube ben.»

9 ¹ O wi'i be kadi: «Ka haqiiqa mi andinii on, no woodi wobbe e mon onon wonbe doo ben, be maayataa adobe yi'ude *laamu Alla ngun no ardi e doole.»

Fii Waylannde MBAADI IISAA NDIN

(Mat. 17.1-13; Luk. 9.28-36)

² Balde jeegoo bawto dñun, Iisaa yetti Petruusu e Yaaquuba e Yuuhanna, o nabi be kambe tun e hoore fello toowungo. MBAADI makko ndin waylii yeeso mabbe,
³ conci makko din jalbi. Hakkee ko di rawni alaa wuppoowo e hoore ndii leydi labbiniroowo non.⁴ Iiliya e Muusaa feejani be, be woni e yewtidugol e makko kanko Iisaa.

⁵ Onsay Petruusu yetti haala kan, o wi'i Iisaa: «Karamoko'en, no moyyi ka wonen doo. Darnen togooji tati, onon wonndu, Muusaa wonndu, Iiliya kadi wonndu.»⁶ (Tawi kanko Petruusu o andaa ko o woni wowlude, ko fii hari kambe tato kulol heewii e mabbe.)

⁷ Tun duulere ari buumi be. Onsay hawa yalti ka duulere, wi'i: «Oo doo ko Biddo an yidaado. Heditee mo!»

⁸ Tun taalibaabe ben ndaari binde don, be yi'itaali hay gooto, si hinaa kambe tun e Iisaa.

⁹ E nder ko be tippotoo kon ka fello, Iisaa yamiri be wota be wowlan hay gooto ko be yi'i kon, haa nde *Bii-Aaden on immintinaa e hakkunde maybe ben woo.

¹⁰ Be maanditii ngol kongol e nder yeddondirgol hakkunde maabbe, hibe wi'a: «Ko hondun woni immitagol e hakkunde maybe ben?»

¹¹ Onsay taalibaabe ben landii mo, be wi'i: «Ko fii hondun jannoobe fii Sariya on ben wi'anta wonde ko Iiliya haani arude taho?»

¹² O jaabii be, o wi'i: «Ko goonga Iiliya aray taho, wattitoo fow. Ko hondun windii fii Bii-Aaden on? Hinaa o tampay fota, o wikkii? ¹³ Kono mi andinii on Iiliya ariino, kono be wadiri mo no be faaliraa non, wano windori fii makko non.»

Fii no Iisaa Selliniri Jinnaado goo

(Mat. 17.14-21; Luk. 9.37-43)

¹⁴ Bay be hewtitii takko taalibaabe ben, be yi'i jamaa duududo e jannoobe fii Sariya on takko mabbe no yeddondira e mabbe. ¹⁵ No jamaa on yiirunoo Iisaa, be ɳaldii fota, be dogi fii hiwroyagol mo. ¹⁶ Kanko Iisaa o landii be, o wi'i: «Ko e hoore hondun wondon yeddondirde e mabbe?»

¹⁷ Onsay gorko goo e nder jamaa on jaabii mo wi'i: «Karamoko'en, mi addanii on oo biddo an gorko, mo jinnawii mbobindinayngii nangi. ¹⁸ Tuma ngii nangi mo woo, ngii libay mo ka leydi, o yaltina ngurda, o ɳatindira jiiyé den, o yoora ken. Mi torike taalibaabe mon ben radagol ngii jinnawii, kono be waawaali.»

¹⁹ Iisaa jaabii be, wi'i: «Onon ko on jamaanu ngu gomdinaa. Ko haa honde tuma mi wodata e mon? E ko haa honde tuma mi mujjnantoo on? Addanee lan mo doo.»

²⁰ Onsay be addani mo mo. No paykun kun yiirunoo Iisaa, jinnawii ngin iirini kun, kun yani ka leydi, kun woni e tallagol, yaltina ngurda. ²¹ Onsay Iisaa landii ben paykun kun: «Ko gila honde tuma dun hewtitii kun?»

Ben makkun jaabii: «Ko gila e booboyaagal makko. ²² Awa kadi soono woo jinnawii ngin bugoto kun ka yiite e ka ndiyan fii mulugol kun. Kono si tawii hidon waawi godđun, yurmee men, wallon men!»

²³ Iisaa kadi wi'i mo: «Wi'udaa si mido waawi! Fow no newanii gomfindo!»

²⁴ Tun ben paykun kun ewnii, wi'i: «Mido gomdini! Kono wallitee lan ko fii gomdinal an ngal no ɲakkanimmi!»

²⁵ Bay Iisaa yi'ii jamaa on no doga, ara e mabbe, onsay o tojani jinnawii ngin, o wi'i: «Ko an, yo jinnawii mbobindinayngii, mi wi'ii ma yo a yaltu e makko, wota a naatitu e makko hande kadi!»

²⁶ Onsay ngii haaci, e hoore iiringol kun ko tiidi, ngii yalti e makkun. Paykun kun wa'i wa maykun, haa duudube wi'i: «Kun maayii!»²⁷ Kono Iisaa jogii kun, immini, kun darii.

²⁸ Bay wonii Iisaa naatii ka suudu, taalibaabe makko ben landii mo e gundoo, be wi'i: «Ko fii hondun menen men waawaali radaade ngii jinnawii?»

²⁹ O wi'i be: «Sifa ngii jinnawii, ko toragol Alla tun waawata ngii yaltinde.»

³⁰ Onsay be iwi don, be tayitoyi Jaliilu. Tawi Iisaa faalaaka andee ko honto o woni,³¹ ko fii hari himo jannude taalibaabe makko ben, o wi'a be: «Bii-Aaden on wattete e juude yimbe ben, be wara mo. Balde tati bawto maygol makko, o immitoo.»³² Kono hari taalibaabe ben alaa faamude din kongudi, awa kadi be huli landitagol mo di.

Fii Burdo Teddude on e Hakkunde Mabbe

(Mat. 18.1-5; Luk. 9.46-48)

³³ Onsay be hewti Kafernahuum. Bay be naatii ka suudu, Iisaa landii be, wi'i: «Ko e hoore hondun wonnodon yeddondirde ka laawol?»³⁴ Kono be deyyi, ko fii hari ka laawol be yewtidii fii andugol ko hombo buri teddude.

³⁵ Onsay kanko Iisaa o joodii, o noddi sappoo e didoo be ben, o wi'i be: «Mo no faalaa wonude arano, o wonay sakkitoro e di fow, kurkaadu fow.»³⁶ Onsay o yetti paykun, o joddini kun hakkunde mabbe. Bay o hirbike kun, o wi'i be:³⁷ «Kala

jabudo paykun tosokun e innde an, haray ko min tigi o jabi. Awa-le kala jabudo lan, haray hinaa min tigi o jabi, kono ko Nuludo lan on.»

³⁸ Onsay Yuuhanna wi'i mo: «Karamoko'en, men yi'ii goddo no radoo jinnaaji e innde mo'on. Men tojani mo dun bay o wondaa e amen fii jokkugol on.»

³⁹ Kono Iisaa wi'i: «Wota on tonjan mo dun. Ko fii hay gooto waawataa wadude kaawake moyyo e innde an, yiltoo kisan bawto dun, wowlammi ko boni. ⁴⁰ Ko fii kala mo wonaa gajo men, haray ko gido men. ⁴¹ Awa kadi, kala okkordo on ndiyen yareeedan e innde an min, fii ko on 6e *Almasiihu on, ka haqiiqa mi andinii on o fadataa mbarjaari makko ndin few.

⁴² «Kono on mo woni sabu feggingol gokkun e koy paykoy gomdinkoy lan, haray ko buri mo moyyande ko kolmbireede tuntere hayre, o bugee ka baharu. ⁴³⁻⁴⁴ Si tawii jungo maa ngon wonay sabu haa feggodaa, haray tayu ngo. Ko fii no buru-maa moyyande ka naataa ka ngurndan, hara ko a taya-jungoojo, edii a jogaade juude didi yahaa ka jahannama, ka yiite nge daanotaako. ⁴⁵⁻⁴⁶ Si tawii-le koynal maa ngal wonay sabu haa feggodaa, haray tayu ngal. Ko fii no buru-maa moyyande ka naataa ka ngurndan, hara ko a taya-koynaljo, edii a jogaade koyde didi, bugedaa ka jahannama. ⁴⁷ Si tawii-le yiitere maa nden wonay sabu haa feggodaa, haray awu nde. Ko fii no buru-maa moyyande ka naataa ka *laamateeri Alla hara ko mo a yiitere wootere, edii a jogaade gite didi, bugedaa ka jahannama ⁴⁸ ka gildi mabbe din maayataa don e ka yiite ngen daanotaako don.

⁴⁹ «Ko fii kala neddo lensinirte yiite. ⁵⁰ Landan ko huunde moyyere, kono si dakamme majjan on iwii, haray ko honno dakamme majjan on wattirtee? Wadee landan e mon onon tigi, wondon e hoore buttu.»

Fii Sertigal Yettindirþe

(Mat. 19.1-12; Luk. 16.18)

10

¹ Onsay Iisaa iwi don, o ari ka seraaji diiwal Yahuuda gada Yurdayniwol, jamaa on moobii kadi takko makko. Wano o woowiri non, o woni e jannugol þe kadi.

² Onsay *Fariisiyaabe goo 6adii mo fii ndarndagol mo, þe wi'i: «E hara no daganii goddo accitugol beyngu mun?»

³ O jaabii þe, o wi'i: «Ko hondun Muusaa yamiri on?»

⁴ Fariisiyaabe ben wi'i: «Muusaa no newnani ontigi wadangol beyngu mun kaydi sertigal, accita mo.»

⁵ Iisaa kadi wi'i þe: «Ko sabu cattal mon 6ernde ngal wadi si Muusaa windani on nden yamiroore.⁶ Kono ka fuddoode, Alla tagii þe, o wadi þe gorko e debbo.

⁷ «Ko dun wadi si gorko selay ben mun e yumma mun,

humoo e beyngu mun,

⁸ onsay kamþe dido þe wona gooto.»^e

Dun haray hinaa þe dido hande kadi, kono ko gooto. ⁹ Awa wota goddo sendindir ko Alla hawtindiri kon.»

¹⁰ Bay wonii þe naatoyii ka suudu, taalibaabe ben landii mo kadi fii dun. ¹¹ O jaabii þe, o wi'i: «Kala accitudo beyngu mun, yetti godðo goo, haray ontigi jeenii e telen-ma makko. ¹² Si debbo kadi seedii e moodi mun, yettoyaama ka godðo, haray on debbo kadi jeenii.»

Fii no Iisaa Du'orani Paykoy koy

(Mat. 19.13-15; Luk. 18.15-17)

¹³ Onsay yimþe ben addani mo paykoy fii yo o meemu koy, kono taalibaabe ben tojani ben. ¹⁴ Bay wonii Iisaa yi'ii dun, o tikki, o wi'i: «Accee paykoy koy ara e an,

^e10.8 Fud. 2.24

wota on hadu koy, ko fii *laamu Alla ngun ko sifa makkoy wonani.¹⁵ Ka haqiiqa mi andinii on, kala mo jabiraali laamu Alla ngun wa paykun, haray o naatataa ton few.»¹⁶ Bawto dun o hirbii paykoy koy, o *fawi juude makko den e makkoy, o du'anii koy.

Fii Hooreejo Aldudo on

(Mat. 19.16-30; Luk. 18.18-30)

¹⁷ Bay wonii Iisaa fokkitii, onsay godđo dogi, ari, jicci yeeso makko. O landii mo, o wi'i: «Karamokoojo moyyo, hara ko hondun mi haani wadude fii yo mi heboy *ngurndan poomayankejandan?»

¹⁸ Onsay Iisaa jaabii mo, wi'i: «Ko fii hondun wi'irtaa mi moyyo? Hay gooto moyyaa si hinaa Alla Bajjo on.¹⁹ Hida andi yamirooje den: dun ko wota a ittu hoore, wota a jeenu, wota a wuju, wota a seedito fenaande, wota a janfo hay gooto, teddinaa kadi yumma maa e ben maa.»^f

²⁰ O jaabii, o wi'i: «Karamoko'en, mido wadude dun fow gila e cukankaaku an.»

²¹ Bay Iisaa ndaaririi mo giggol, o wi'i mo: «No ȳakkan-maa fahin huunde wootere: yahu yeeyitaa kala ko jeydaa, okkaa miskinbēben, dun wonanoyte keyee ka kammuuli, onsay araa jokcaa mi.»²² Bay on nanii din kongudi, o n̄irbinii, o yahi himo aani, ko fii hari himo aldi fota.

Fii Accube ko Jeyi kon fow, Jokki Iisaa

²³ Onsay kanko Iisaa o wi'i taalibaabe makko ben: «Emba no sattani jom jawle en ka bē naata ka laamu Alla.»

²⁴ Taalibaabe ben ȳaldi fii din yewtereeji. Kanko Iisaa o fillitii kadi, o wi'i bē: «Faybe an, emba naatugol ka laamu Alla no satti.²⁵ No buri weebande ngelooba ka mba rewa e wuddere meselal edii ka jom jawle en naata ka laamu Alla.»

^f10.19 Egg. 20.12-16

²⁶ Taalibaabe ben burti ŋaldude kadi, ɓe woni e wi'indirgol: «E hara ko hombo dandoytee?»

²⁷ Iisaa ndaari ɓe, wi'i: «Dun waawantaako neddanke, kono Alla kan wonaa non, kala huunde no waawanoo mo.»

²⁸ Onsay Petruusu wi'i mo: «Awa e hino, men accii ko men jeyi kon fow, men jokkii on.»

²⁹ Iisaa jaabii, o wi'i: «Ka haqiiqa mi andinii on, kala accudo suudu mun ndun e musibbe mun ben e bandiraabe mun ben e yumma mun e ben mun e bibe mun ben e gese mun den sabu innde an nden e Kibaaru Moyyo on, ³⁰ o heboyay ko buri dun laabi teemedere: cuudi e musibbe e bandiraabe e neeniraabe e bibe e gese e cukkeede ka aduna doo. Ka aduna aroyoowo o heboyay ngurndan poomayankejan. ³¹ Kono wonbe yeeso buy wontiroyay baawo, baawoobe ben wontiroya yeeso.»

Fii ko Saatii Heboyde Iisaa kon

(Mat. 20.17-19; Luk. 18.31-34)

³² Nde tawnoo hibe ka laawol fii yahugol Yerusalaam, Iisaa wonti yeeso mabbe, taalibaabe ben ŋaldi, jokkunoobe ben kadi huli. Iisaa pottini sappoo e didoobe ben sera, o woni be e yewtugol ko heboyta mo kon. ³³ O wi'i be: «Awa hidet yahude Yerusalaam. Bii-Aaden* on wattete e juude hooreebe yottinoobe sadaka ben e jannoobe fii Sariya on ben, be happana mo wareede, be watta mo e juude be wonaa Yahuudiyanke ben, ³⁴ ben jala mo, be tutta e hoore makko, be focca mo, onsay be wara mo. Balde tati ɓawto dun o immitoo.»

Fii ko Yaaquuba e Yuuhanna Torii Iisaa kon

(Mat. 20.20-28; Luk. 22.25-27)

³⁵ Onsay Yaaquuba e Yuuhanna, dün ko bibe Zabadii ben, badii Iisaa, be wi'i mo: «Karamoko'en meden faalaa yo on wadan men ko men torotoo on kon.»

³⁶ O wi'i ɓe: «Ko hondun faaladon yo mi wadan on?»

³⁷ Be wi'i mo: «Ko yo on newnan men joodoyagol ka laamu mon darjinngu, goddo e amen wonira ka jaamo mon, oya on ka nano mon.»

³⁸ Kono Iisaa wi'i ɓe: «On andaa ko wondon lan toraade. E hara on waaway yarirde jardukun tampere kun mi yarirta kun, maa looteede lootannde tampere nde mi lootoytee nden?»

³⁹ Be jaabii: «Men waaway.»

Iisaa wi'i ɓe kadi: «Ko goonga on yariray jardukun kun mi yarirta kun, e on lootete lootannde tampere nde mi lootoytee nden. ⁴⁰ Kono fii joodoyagol ka jaamo an maa ka nano an, hinaa min yedata dun: don no yedaa ɓe fii mun ebbanaa ben.»

⁴¹ Bay ɓeya taalibaabe sappo nanii dun, ɓe fuddii seytinande Yaaquuba e Yuuhanna. ⁴² Onsay Iisaa noddi ɓe, o wi'i: «Hidon andi bee ɓe jogitorden wa hooreebe diya ley়ি no laamori di doole, awa kadi lambe mabbe ben no fey়intini laamu ngun e hoore mabbe. ⁴³ Kono onon, wota on wa'u wa ben. Kala faalaado wonde teddudo e hakkunde mon, yo wonu kurkaadu mon. ⁴⁴ Awa kadi kala faalaado wonde yeesoojo e hakkunde mon, yo wonu maccudo fow, ⁴⁵ ko fii Bii-Aaden on ardaali fii kurkanegol, kono ko fii kurkanagol, okkitira ngurndan mun dan fii cottudi duudube.»

Fii no Iisaa Wuntiniri Bundo Yeerikoo

(Mat. 20.29-34; Luk. 18.35-43)

⁴⁶ Onsay ɓe hewti Yeerikoo. Bay wonii kanko Iisaa e taalibaabe makko ben e jamaa duududo on ɓe yaltii don, tawi bundo torotoodo no wi'ee Bartimaawu, on ko biddo oo wi'eteedo Timaawu, no joodii ka sera laawol. ⁴⁷ O nani wonde ko Iisaa oo jeyaado Naasirata woni feyyude. Onsay o woni e ewnagol, wi'a: «Ko an yo Iisaa, ɓii Daawuada, yurminan!»

⁴⁸ Duudube feli mo fii yo o fanku, kono o burti ewnaade, wi'a: «Ko an yo bii Daawuuda, yurminan!»

⁴⁹ Onsay Iisaa dartii, o wi'i: «Noddee mo!»

Be noddi bundo on, e hoore hibe wi'a mo: «Wakkilo, immodaa, himo noddude ma!»⁵⁰ Bundo on kadi bugii dolokke mun on, immii tinna, o ari e Iisaa.

⁵¹ Onsay Iisaa jaabii mo, wi'i: «Ko hondun faaladaa yo mi wadane?»

Kanko bundo on o wi'i mo: «Karamoko'en, ko yo mi hettu giide an den.»

⁵² Iisaa wi'i mo kadi: «Yahu, gomdinal maa ngal hisinii ma.» Don kisan o wunti, o woni e jokkugol Iisaa e yaadu ndun.

Fii Naatugol Iisaa Yerusalem

(Mat. 21.1-11; Luk. 19.28-40; Yhn. 12.12-19)

11 ¹ Bay wonii ɓe badike Yerusalem haa ɓe hewtii Bayti-Faazii e *Betanii, dun ko takko Fello *Zaytuuni ngon, kanko Iisaa o nuli taalibaabe makko dido, ² o wi'i ɓe: «Yahee e ngoo hodo wongo yeeso mon doo. No naatirdon e maggo on taway don mbabun kun goddo waddaaki haa hande no humii don. Hunton kun, addon. ³ Si goddo aru on e landaade: «Ko hondun wadanton dun?», on wi'ay mo: «Ko haaju Koohoojo on yani e makkun. O artiray kun ko neebaa.»»

⁴ Onsay ɓe yahi, ɓe tawi mbabun no humii ka yaasi e binde dambugal ka datal, ɓe hunti kun. ⁵ Wobbe e wonnoobe don ben wi'i ɓe: «Ko hondun wadi si hidon huntude mbabun kun?»⁶ Be jaabori no Iisaa wiirunoo ɓe non. Onsay be acci be yahi. ⁷ Be addani Iisaa mbabun kun. Be ndaddani mo conci mabbe din e hoore makkun. Iisaa joodii e hoore makkun. ⁸ Yimbe buy ndaddani mo conci mun din ka laawol, wobbe caldi di ɓe saltii ka buruure din. ⁹ Tawi hikkornoobe yeeso makko ben e iwtirnoobe baawo ben no ewnaade wi'a:

«*Hosanna!

Yo barki wonan oo wondo arude e innde Joomiraado on!

¹⁰ Barki wonanii nguu laamu wongu arude,
dun ko nguu laamu ben men Daawuuda!
Darja burdo toowude wonanii mal»^g

¹¹ Bay Iisaa naatii Yerusalaam, o yahi ka *juulirde mawnde, o taskii fow. Nde tawnoo nibbii, o yahi Betanii kanko e sappoo e didooobe ben.

Fii no Iisaa Hudiri Yibbehi

(Mat. 21.18-19)

¹² Bimbi nden jande, ko ɓe yaltata Betanii, kanko Iisaa o weelaa. ¹³ O haynii yibbehi maruki haako ka wodditii. O yahi ndaarugol si o taway ton godđun. Bay o ɓadike o tawi ko haako tun, ko fii hari hinaa dabbunde yibbe. ¹⁴ Onsay o wi'i ki: «Wota godđo jaamitu hande kadi bibbe maa ben.» Taalibaabe makko ben nani ko o wi'i kon.

Fii no Iisaa Radori Yeeyoobe ben ka Juulirde Mawnde

(Mat. 21.12-17; Luk. 19.45-48; Yhn. 2.13-16)

¹⁵ Bay ɓe hewtii Yerusalaam, Iisaa naatiri ka dingiral juulirde mawnde, o woni e radagol yeeyaynoobe ben e soodaynoobe ben ka juulirde. O wayliti taabe wadaynoobe sensa-sensita ben e julle yeeyaynoobe gabooji ben. ¹⁶ Tawi o jabataa hay gooto nabora godđun ka nder dingiral juulirde, ¹⁷ e hoore himo jannaynoo ɓe, wi'a: «Hinaa no windii: <Suudu an ndun innoyte suudu torordu ndu leyýi din fow torotoo Alla e mun?>^h Kono onon on wattii ndu fammeere wuybe!»ⁱ

¹⁸ Kono bay hooreebe *yottinoobe sadaka ben e jannoobe fii Sariya on nanii dün, ɓe woni e dabbugol feere no ɓe sahinbinira mo. Kono tawi hibe huli mo, ko fii hari jamaa on fow no ɣaldidi e ko o jannata kon. ¹⁹ Bay nibbii, Iisaa e taalibaabe mun ben yalti ka saare.

^g11.10 Zab. 118.25-26

^h11.17a Isa. 56.7

ⁱ11.17b Yer. 7.11

Jannde fii Yibbehi kin

(Mat. 21.20-22)

²⁰ Wa ko ɓe feyyata bimbi, taalibaabe ɓen yi'i kiya yibbehi no yoori haa ka dadí.

²¹ Onsay Petruusu anditi ko feyyí kon. O wi'i Iisaa: «Karamoko'en, ndaaree!

Yibbehi ki hudunodon kin yoorii!»

²² Iisaa yetti haala kan, wi'i ɓe: «Gomdinee Alla! ²³ Ko fii, ka haqiiqa mi andinii on, si goddo wi'u ngoo fello yo ngo boro doo, ngo yaha ka baharu, hara o sikkitaaki ka bernde makko, hara himo gomdini ko o wi'i kon waday, dun wadante mo. ²⁴ Ko dun wadi si mi wi'ay on, kala ko landidon e nder toragol Alla, hoolee on hendike dun, dun wadante on. ²⁵ Nde hidon toroo Alla, hara hidon seytinani goddo, yaafee mo, fii no Ben mon Wondo ka kammu on yaaforana on onon kadi bonnereeji mon din. ²⁶ Kono si on yaafanaaki ɓe, haray Ben mon Wondo ka kammu on kajun kadi yaafantaako on bonnereeji mon din.»

Lande fii Bawgal Iisaa ngal

(Mat. 21.23-27; Luk. 20.1-8)

²⁷ Be yiltitii kadi Yerusalaam. E nder ko Iisaa jindata kon ka nder juulirde mawnde, hooreebe yottinoobe sadaka ɓen e jannoobe fii Sariya on wondude e mawbe ɓen ari e makko. ²⁸ Be wi'i mo: «Ko e ley kongol hombo wondaa wadude dun e ko e ley kongol hombo wondaa fii ko wondaa wadude koo?»

²⁹ Iisaa jaabii ɓe, wi'i: «Min kadi mi landoto on huunde wootere. Si on jaabike lan, onsay mi yeetoto on ko e ley kongol hombo mi woni wadirde dun. ³⁰ E hara lootugol ko Yaaya lootaynoo yimɓe ɓen kon, ko honto iwri: ko ka arsi, kaa ko e neddanke? Jaabee lan.»

³¹ Kono ɓe wi'indiri: «Si en jaabike mo ko ka arsi iwri, o wi'ay en ko hondun hadunoo gomdinen mo? ³² Si en jaabike mo-le ko e neddanke dun iwri.» (E hin-le

hibe huli jamaa on, ko fii fow no jogori Yaayaa wa annabaajo tigi.)³³ Onsay ɓe jaabii Iisaa: «Men andaa.»

Kanko kadi o wi'i ɓe: «Min kadi mi wowlantaa on ko e ley kongol hombo mi woni wadirde dün.»

Misal Yettaangal e Halfinaaɓe Tutateeri Wiijnu

(Mat. 21.33-46; Luk. 20.9-19)

12

¹Bawto dün Iisaa woni kadi yewtirgol ɓe mise, o wi'i ɓe: «Goddo tutuno *wiijnu, o howi tutateeri ndin, o jasi ngayka fii ka wiijnu on oyfée, o wadi bente ka reenoowo on wona, o halfini ndi remoobe wiijnu ben, o yahi safaari. ²Bay saa'i sonitugol wiijnu on hewtii, o immini kurkaadu makko haa e remoobe wiijnu ben fii yo ben jonnan mo ɓibbe wiijnu gebal makko ngal. ³Kono ben hendii mo piyi, ɓe immintini mo juude mehe. ⁴O immini kurkaadu makko goo kadi, ɓe piyi ondon kadi e hoore, ɓe hersini. ⁵O immini kadi tammo, ɓe wari on. E duudube ɓe o imminnoo piyaa, woobbe waraa.

⁶«Tawi ko biddo makko yidaado on tun o luttrinoo. Ka sakkitorun o immini mo haa e mabbe, himo wi'a: «Be teddinay biddo an on.»

⁷«Kono kambe remoobe wiijnu ben ɓe haldi: «Bay ko oo woni ronoowo on, waren mo, dun ndondi ndin wontanay en!»⁸ Onsay ɓe nangi mo, ɓe wari, ɓe bugii ka baawo tutateeri wiijnu.»

⁹Iisaa wi'i kadi: «Jooni non, hara ko hondun jom ndin tutateeri wiijnu wadata ben? On aray, re'a ben remoobe wiijnu, o jonna tutateeri ndin woobbe goo.»¹⁰ Onsay Iisaa wi'i ɓe kadi: «E hara on jangaali ko bindi din wi'i kon? Ko fii hidî wi'i wonde:

«Hayre nde mahooɓe ben hawkunoo nden
wontii hittunde ka sobbundu.

¹¹Dun ko e Joomiraado on iwri,

dun no hawnii e gite men!»^j

¹²Bay ɓe faamii wonde ko fii maɓbe Iisaa wadani ngal misal, ɓe woni e dabbugol feere no ɓe nangira mo, kono hari hibe huli jamaa on. Onsay ɓe acci mo don, ɓe yahi.

Fii no Iisaa Ndarndoraa fii Yoɓugol Sagalle

(Mat. 22.15-22; Luk. 20.20-26)

¹³Onsay ɓe immini e Iisaa *Fariisiyaabe goo e yimɓe Heroodu goo fii ko nangira mo kongudi makko din. ¹⁴Ben ari, wi'i mo: «Karamoko'en meden andi ko on nundube, awa kadi on denyotaako hay gooto, ko fii on burdindinaa yimɓe ɓen, hidon jannirde laawol Alla ngol goonga. E hara no haani ka men yoɓa lando mawdo Roomu on sagalle, kaa haanaa? Meden haani yoɓude kaa men haanaa yoɓude?»

¹⁵Nde tawnoo Iisaa no andi faasiqyaagal maɓbe ngal, o jaabii ɓe, o wi'i: «Ko fii hondun ndarndorton mi? Addanee lan *dinaruuru, mi ndaara.»¹⁶Be addi wooturu. Iisaa landii ɓe wi'i: «Ko nandolla hombo e bindi hombo woni e mayru?» Be jaabii: «Ko lando mawdo Roomu on.»

¹⁷Onsay o wi'i be: «Jonnitee lando mawdo Roomu on ko makko kon, jonniton Alla kadi ko mun kon.» Be ɻaldì e makko.

Fii Sadduusiyaabe ɓen e Ummatal ngal

(Mat. 22.23-33; Luk. 20.27-40)

¹⁸Sadduusiyaabe*, wi'ube wonde ummutal alaa ɓen, ari landii Iisaa, ɓe wi'i mo:

¹⁹«Karamoko'en, e hino ko Muusaa wi'i men kon: Si goddo maayii accii beyngu e ɓaawo biddo, haray mijnjiraawo on maydo no haani yettude on keynguujo mo o

^j12.11 Zab. 118.22-23

acci fii no o hebirana on kotiraawo makko jurriya.²⁰ Tawa non ɓen ɓibbe ko ɓe njeedido. Arano on jombii, maayii, accaali jurriya.²¹ Dimmo on kadi yettii on keynguujo, maayii, accaali jurriya. Tammo on kadi wano non.²² Tawii hay gooto e ɓen njeedido accaali jurriya. Bay feyyii e maabbe ɓe fow, debbo on kadi maayii.²³ Bay hari ɓen njeedidoo non resii on debbo, ko hombo e ɓen on debbo wontanoyta ka ummutal?»

²⁴ Iisaa jaabii ɓe, wi'i: «E hino ko wadi kon si hidon e nder palji, ko fii on alaa faamude bindi din, on alaa faamude kadi bawgal Alla ngal.²⁵ Ko fii ka ummutal, worbe ɓen resataa, rewbe ɓen kadi resetaake, kono ɓe wa'ay wa malaa'ikaabe ɓen ka kammuuli.²⁶ E on jangaali ka deftere Muusaa fii maybe ɓen kan e ummutal maabbe ngal, ko Alla daalani mo kon ka binde pitahun, wonde: ‹Ko min woni Alla Ibraahiima e Alla Issaaqa e Alla Yaaquuba?»^{k27} Awa Alla wonaa Alla maybe ɓen kono ko o Alla wurbe ɓen. Awa on faljii few!»

Fii Yamirooje Burde Mawnude den

(Mat. 22.34-40; Luk. 10.25-28)

²⁸ Goddo e jannoobe fii Sariya on ɓen, bay nanii ko ɓe yewtidi kon, o ndaarii kadi o tawii Iisaa jaaborii no moyyiri, o badii, o landii mo: «E nder yamirooje den fow ko hondun adii?»

²⁹ Iisaa jaabii, wi'i: «E hino ko adii kon: ‹Heditee yo *Banii-Isra'iila'en, Alla Joomiraado men on ko Joomiraado gooto,³⁰ awa kadi yo a yidir Alla Joomiraado maa on bernde maa nden fow e wonkii maa kin fow e hakkil maa kin fow e doole maa den fow.»^{m31} E hino ko hikki don kon: ‹Yo a yidir nokondo maa on wano yidirdaa hoore maa non. Yamirooje goo burde dee mawnude alaa.»»ⁿ

^k12.26 Egg. 3.6

^m12.30 Yajn. 6.4-5

ⁿ12.31 Lew. 19.18

³² On jannoowo fii Sariya on wi'i mo: «Moyyii, yo karamoko'en, on wowlili goonga wi'ugol Alla ko Bajjo, goddo goo kadi alaa ko wonaa kanko, ³³ yidira mo bernde mun nden fow e hakkil mun kin fow e doole mun den fow, e yidirgol nokondo mun wa hoore mun, dun no buri sadakaaji sunneteedi din fow e diya sadakaaji fow.»

³⁴ Bay Iisaa ndaarii tawii o jaaborii hakkil, o wi'i mo: «A woddfondiraa e *laamu Alla ngun.» Bawto dun hay gooto suusaali mo landaade.

Fii Hakkunde Almasiihu on e Daawuuda

(Mat. 22.41-46; Luk. 20.41-44)

³⁵ Wa fewndo ko Iisaa jannata ka *juulirde mawnde, o wi'i: «Ko honno jannoobe fii Sariya on ben waawiri wi'ude wonde *Almasiihu on ko jurriya Daawuuda? ³⁶ E hin-le, immorde e *Ruuhu Seniido on, Daawuuda tigi no wi'i:

⟨Joomiraado on daalani Joomi an on:

Joodor ka sengo an jaamo,
haa mi wada aybe maa ben ka ley teppe maa.ⁿ

³⁷ «Daawuuda tigi wi'ii Almasiihu on ⟨Joomi⟩, haray ko honno non Almasiihu on woniri jurriya makko?»

Tawi jamaa duududo no hedii mo e nder weltaare.

³⁸ O wi'i be e nder ko o waajotoo kon: «Reenee e bee jannoobe fii Sariya on, dun ko bee yidube jindidugol e dolokkaaji njani, yidi hiwreede ka fottirde, ³⁹ yidi saffawol aranol ngol ka juulirde, yidi ndaddule arane den ka nafagol. ⁴⁰ Hibe jatta galleiji keynguube, hibe junna julde mabbe fii yiingo. Awa ben heboyay naawooje burde sattude.»

ⁿ12.36 Zab. 110.1

Fii Sadaka mo Keynguujo on Itti on

(Luk. 21.1-4)

⁴¹ Onsay Iisaa joodii ka yeeso arkawal sadaka, o woni e ndaarugol wadaynoobe ton kaalisi ɓen. Aldube buy wadi ton kaalisi duududi. ⁴² O yi'i kadi keynguujo baaso no liba ton tammahoy dīcōy, fotaykoy e peccun gootun si mbuudu feccaama nay. ⁴³ Onsay kanko Iisaa o noddi taalibaabe makko ɓen, o wi'i ɓe: «Ka haqiqiqa mi andinii on, ko oo keynguujo baaso itti kon no ɓuri ko ɓeya fow itti kon wadi ka arkawal sadaka. ⁴⁴ Ko fii ɓeya fow ko ko burtani dun kon ɓe wadi, kono kanko keynguujo on e waasidude, ko ko o mari kon fow fii ko o wuurira o wadoyi ton.»

Maandeeji fii Artoygol Iisaa Almasiihu on

(Mat. 24.1-2; Luk. 21.5-6)

13

¹ Wa fewndo ko Iisaa iwata ka *juulirde mawnde, goddo e taalibaabe makko ɓen wi'i mo: «Karamoko'en, ndaaree kaaye labaade e darnoodi fotundi!»

² Iisaa jaabii mo, wi'i: «A yi'ii ndii darnoodi mawndi? Hay hayre e hoore hayre luttoytaa doo ko lancaaka.»

³ Onsay o joodoyii ka Fello *Zaytuuni yeeso juulirde nden. Onsay Petruusu e Yaaquuba e Yuuhanna e Andaraawu landii mo e gundoo, ⁴ ɓe wi'i: «Yeeto men ko honde tuma dun wadoyta, e ko hondun wonoyta maande laatagol dun fow?»

⁵ Onsay Iisaa wi'i ɓe: «Reenee fii wota hay gooto faljin on, ⁶ ko fii buy aroyay ɓaarora innde an nden, hara no wi'a ko kajun woni *Almasiihu on. Awa ɓen faljinoyay yimɓe duudube. ⁷ Awa kadi, nde nanoydon fii hareeji no wowlee woo, e haalaaji fii gereeji, haray wota on hulu, ko fii bee dun wada, kono hinaa don wonata lannoode nden. ⁸ Hareeji kadi wadoyay hakkunde leyfí din. Laamateeriji din kadi immondirana, dimbande leydi wadira e nokkeeli goo, heegeeji kadi wada. Ko dun wonata fuddoode sattendeesi nanditaydi e muuseendi ɣata din.

⁹ «Awa reenee hoore mon, ko fii be naboyay on ka naawirdi, be foccoya on ka juulirde, nabedon ka yeesoobe ben e ka lambe ben sabu an, fii ko wonana be seedee. ¹⁰ Kono ko adii kon bee Kibaaru Moyyo on fejjinanee leyyi din fow.

¹¹ Kono tuma be nabi on fii wattugol on e joge, wota on jiboyo ko wi'on. Kono wowlee ko longinadon e on saa'i don kon tigi. Ko fii haray hinaa onon woni wowlude, kono ko *Ruuhu Seniido on. ¹² Ko fii goddo yettoyay musiddo mun, watta mo e joge fii yo o ware, baabaajo kadi warra non biddo mun. Faybe ben kadi hawtanoyoo mawbe mun ben, be wona sabu haa be waree. ¹³ Fow ajoyay on sabu innde an nden. Kono mo janjike dun haa ka lannoode, o dandoyte.

¹⁴ «Nde yi'udon huunde harmunde caabinaynde nden daakike ka nde haanaa wonude don woo,¹⁵ (haray yo jangoowo on faamu), onsay yo hodube ka diiwal Yahuuda ben dogir ka pelle. ¹⁵ On wondo ka fowtorde hoore suudu mun wota tippano godsun ka nder suudu. ¹⁶ On wondo kadi ka ngesa wota yiltito fii yettugol dolokke mun on. ¹⁷ E nder den balde don, bone wonanay sowiibe ben e muyninaybe ben. ¹⁸ Awa toree fii wota dun ardu ndungu. ¹⁹ Ko fii satteende waday e den jalaade nde sifa mun wadaali haa hande, gila ka fuddoode aduna mo Alla tagi, e nde buri mun waditataa han kadi. ²⁰ Si tawno Joomiraado on rabbindinaano den jalaade, hay gooto dadataano, kono o rabbindinay de sabu subaabé be o subii ben.

²¹ «Awa si goddo aru on e wi'oyde wonde: ‹Almasiihu on no doo!› maa ‹himo daa!›, wota on hoolo mo. ²² Ko fii waditiibe almasiihu e waditiibe annaba feenoyay, be wadoya maandeeji e kaawakeeji fii no be faljinira hay subaabé ben, si no gasaynnoo. ²³ Awa reenee, ko fii mi *hiitanike on fii dun fow.»

¹⁵13.14 Dan. 9.27, 11.31, 12.11

Fii Ardu Bii-Aaden on, dñun ko Iisaa

(Mat. 24.29-31; Luk. 21.25-28)

²⁴ «Kono e den jalaade, bawto nden satteende, «Naange ngen nibbitay, tawa lewru ndun jalbataa, ²⁵ koode den ka kammu kadi yana, ko tiidi kon ka kammu kadi dimboyoo.»^p

²⁶ «Ontuma non *Bii-Aaden on yi'oyte, no ara e duule, hara himo arda e bawgal mawngal e mangural. ²⁷ Onsay o nuloya malaa'ikaabe makko ben, o mooba subaabbe makko ben gila funnaange hebi hirnaange e gila nano hebi jaamo, gila ka leydi haa ka kattudi kammuuli.

²⁸ «Yo misal yibbehi kin wonan on gandal. Nde caldi makki on heccidiri, di wiliti, on andanay hoore mon wonde setto ngon badike. ²⁹ Ko wano non kadi, no yiirudon dii piiji no wada woo, haray andee wonde *Bii-Aaden on badike ka dambugal. ³⁰ Ka haqiiqa mi andinii on, dñun fow waday ado nguu jamaanu feyyude. ³¹ Kammu ngun e leydi ndin feyyay, kono min kongudi an din feyyataa.

³² «Kono hay gooto andaa fii nden jalaande e on saa'i, hinaa hay malaa'ikaabe ben ka kammuuli, hinaa hay Biddo on, kono ko Baabaajo on tun andi fii nden jalaande e on saa'i. ³³ Awa reenee, wattanon yiila! Ko fii on andaa nde on saa'i wonata. ³⁴ Dun no wa'i wa neddo wondo yahude safaari, acca suudu mun, o halfina mo kala e kurkaaduube makko ben golle mun, o yamira wondo ka dambugal on aynugol. ³⁵ Awa, wattanee yiila, ko fii on andaa nde jom suudu ndun artata, si ko kiikiide, maa si ko tumbere jemma, maa si ko ndonto no yogga, maa si ko bimbi. ³⁶ Hulee wota o aru cuppet, o tawa hidon daanii. ³⁷ Ko mi wowlani on kon, ko fow mi wowlani: wattanee yiila!»

^p13.25 Isa. 13.10 e 34.4

Fii no Hooreebe Diina ɓen Haldiri Janfagol Iisaa

(Mat. 26.1-5; Luk. 22.1-2; Yhn. 11.45-53)

14

¹Tawi, si balde didi feyyii, *Juldeere Yawtaneede nden e *Juldeere Bireedi de Aldaa e Lewen den waday.^q Tawi hooreebe yottinoobe sadaka ɓen e jannoobe fii Sariya on ɓen no dabbaynoo ko honno ɓe nangirta Iisaa yoyre, ɓe wara mo. ²Tawi hibe wi'a: «Hinaa ka fewndo juldeere, fii wota murtaldu wadu e hakkunde jamaa on.»

Fii no Debbo Juuriri Nebban ka hoore Iisaa

(Mat. 26.6-13; Yhn. 12.1-8)

³ Nde tawnoo Iisaa no ka saare *Betanii ka suudu Sim'uunu oo nawnunoodo damajan, wa fewndo ko o joodii fii nafagol, debbo naati. Tawi on debbo no jogii tindohun hayre daneere tew angiri laabundi, satta-cogguuri, no wi'ee 〈naar〉. On debbo fusi tindohun kun, o juuri angiri ndin ka hoore Iisaa.

⁴ Wobbe e taalibaabe ɓen seytini, ɓe wi'indiri: «Ko hondun woni nafa bonnugol ndii angiri? ⁵ Ko fii en waawayno ndi yeeyude buri *dinaruuji teemedde tati, okken miskinbe ɓen!» Onsay ɓe feli debbo on.

⁶ Kono Iisaa wi'i: «Tertee mo! Ko fii hondun sattinanton mo? Ko kuugal moyyal o wadanimmii. ⁷ Miskinbe ɓen kan, hidon wondi e mabbe soono woo, on waaway ɓe wadande ko moyyi nde faaladon woo, kono min, on wodataa e an soono woo.

⁸ Kanko debbo on o wadii ko o waawi kon: o urnii ɓandu an ndun ado ndu surreede. ⁹ Ka haqiiqa mi andinii on, kala ka oo Kibaaru Moyyo fejninaa e aduna on, fii koo ko oo debbo wadi kadi sifete, o anditanee.»

^q14.1 Egg. 12

Fii no Yudaasi Janfori Iisaa

(*Mat. 26.14-16; Luk. 22.3-6*)

¹⁰ Onsay godđo e *sahaabaabe Iisaaben sappoo e dido, dun ko Yudaasi Iskariiyu, yahi tawoyi hooreebe yottinoobe sadaka ben, fii no o wattira Iisaa e juude mabbe.

¹¹ Be hedii mo, be weltori dun, be fodi mo yeenugol mo kaalisi. Onsay, kanko Yudaasi, o woni e dabbugol feere no o wattira Iisaa e juude mabbe.

Fii Nafakka Juldeere Yawtaneede nden

(*Mat. 26.17-29; Luk. 22.7-23; Yhn. 13.21-30*)

¹² Ka nallal aranal Juldeere Bireedi de Aldaa e Lewen den, dun ko jande baalun kun hirsetee, taalibaabe Iisaa ben wi'i mo: «Ko honto faaladon yo men moyýinanoy on nafakka Juldeere Yawtaneede nden?»

¹³ Onsay o immini dido e taalibaabe makko ben, o wi'i be: «Yahee ka saare. On fottay e gorko rondiido loonde ndiyan, on jokkay mo. ¹⁴ Ka o naatiri woo, on wi'ay jom ndun suudu: <Karamoko'en wi'ii men yo men lando on ko honto be weerata, be nafoda e taalibaabe mabbe ben nafakka Juldeere Yawtaneede nden?>¹⁵ Ontuma o hollay on konkooru njanndu, weyýitaandu wertaa, ka koore dow. Ko don moyýinton.»

¹⁶ Bay taalibaabe ben yahii, be hewtoyii ka saare, be tawroyi no o haalirannoo be non, be moyýini nafakka juldeere nden.

¹⁷ Bay niibii, kanko Iisaa o ardi e sappoo e didooobe ben. ¹⁸ Wa fewndo ko be joodii, hibe nafaade, kanko Iisaa o wi'i be: «Ka haqiiqa mi andinii on, godđo e mon, mo mi woni hawtidude, janfoto lan.»

¹⁹ Onsay be fuddii aanude fota, mo bee e mabbe woni e wi'ugol mo: «E hara ko min?»

²⁰ O jaabii be, o wi'i: «Ko godđo e onon sappoo e didooobe ben, dun ko on mo mi yollidi jungo e miran gooto. ²¹ Awa *Bii-Aaden on no yahude wano fii makko

windori non, kono bone wonanii on janfotoodo Bii-Aaden on! Ko burnoo moyyande on neddo ko si o jibinanookal!»

²² Ender ko be jaamata kon, Iisaa yetti bireedi. Bay o gaynii du'aade, o tayiti, o jonni be, e hoore himo wi'a: «Jabee jaamon, dundoo ko bandu an ndun nii.»

²³ O yetti kadi jardukun wadorkun njaram, o jarni Alla, o jonni be, be fow be yari.

²⁴ O wi'i be kadi: «Dundoo ko yiyan an dan nii, yiyan *ahadi hibboyteedan fii duudube. ²⁵ Ko fii ka haqiiqa mi andinii on, mi yaritataa hande kadi njaram bibbe *wiiju haa nande mi yaritoya njaram wiiju kesan ka *laamateeri Alla.»

²⁶ Bay wonii be beytii beyti Zabuura, be yahi ka Fello *Zaytuuni.

Fii no Iisaa Hiitorii fii Yeddanne Petruusu nden

(Mat. 26.31-35; Luk. 22.31-34; Yhn. 13.36-38)

²⁷ Onsay Iisaa wi'i be: «On fow on selay lan, ko fii no windii: «Mi waray ngaynaako on, wuro baali ngon saakoo.»^{r28} Kono tuma mi immintinaa, mi hikkanto on yeeso, tawoyon mi Jaliilu.»

²⁹ Petruusu wi'i mo: «Hay si fow selay on, min dun wonantaa lan!»

³⁰ Onsay Iisaa jaabii mo, wi'i: «Ka haqiiqa mi andinii ma, hande e oo jemma tigi, ado ndonto yoggude laabi didi, haray a yeddii fii an laabi tati.»

³¹ Kono Petruusu tentini fota, o wi'i: «Hay si tawii bee mi maayida e mon, mi yeddataa fii mon few!» Beya fow kadi wi'iri non.

Fii no Iisaa Torori Alla ka wi'eteetee don Jatsaymaani

(Mat. 26.36-46; Luk. 22.39-46)

³² Bawto dun be yahi e ndee nokkuure wi'eteende *Jatsaymaani. Kanko Iisaa o wi'i taalibaabe makko ben: «Joodee doo haa mi toroyoo.»³³ O nabori Petruusu e

^r14.27 Zak. 13.7

Yaaquuba e Yuuhanna. Onsay, o fuddii hebude annde e sokola,³⁴ o wi'i ɓe:
 «Wonkii an kin no aani haa e mayde. Wonee doo, hiiren.»

³⁵ O yahi yeeso seeda, o sujji, o torii, o wi'i: «Si no gasa yo oo saa'i yawtan.»³⁶ O wi'i kadi: «Abba*, Baaba an, hida waawi kala huunde. Yo kun jardukun tampere pottito lan. Kono non wota faale an on wadu, kono yo faale maa on wadu.»

³⁷ O artoyi e taalibaabe ɓen, o tawi ɓe daanike. O wi'i Petruusu: «Sim'uunu, a daanike? Jaka a waawaali hiirude hay saa'i gooto? ³⁸ Hiiree torodon fii wota on naatu e jarrabi. Wonkii kin no yidi wadugol ko moyyi, kono bandu ndun no lo'i.»

³⁹ O wodditii ɓe kadi dimmun, o torii, o fillitii diya kongudi. ⁴⁰ O artoyi kadi, o tawi ɓe daanike, ko fii hari gite mabbe den teddii. Tawi ɓe andaa ko ɓe wi'a mo.

⁴¹ O artoyi tammun, o wi'i ɓe: «E on daani kadi, fowtidon? Jooni yonii, saa'i on hewtii. Awa Bii-Aaden on no watteede e juude junuubanke'en. ⁴² Immee mahen, ko fii wondo janfaade lan on badike!»

Fii no Iisaa Nangiraa

(Mat. 26.47-56; Luk. 22.47-53; Yhn. 18.3-12)

⁴³ E nder ko o yewtata kon, hawrondiri Yudaasi, tawdaado e sappoo e didooɓe ɓen, hewtidii e jamaa jogiido kaafaaje e bedi, immorde e hooreebə yottinoobə sadaka ɓen e jannoobə fii Sariya on ɓen e mawbe ɓen.

⁴⁴ Tawi wondo mo janfaade on wadaniino ɓe ndee maande doo, o wi'i: «Mo mi hirbii woo, haray ko on. Nangee mo, nabon, aynon mo fota.»⁴⁵ Tun o hewti, o ɓadii Iisaa, e hoore himo wi'a: «Karamoko'en!» Onsay o hirbii mo. ⁴⁶ Onsay ɓen yimbe fawi Iisaa juude, ɓe nangi mo. ⁴⁷ Tun goddo e wonnoobə don ɓen sorti kaafamun kan, o soppi kurkaadu yottinoowo mawdo sadaka on, o itti mo nowru ndun.

⁴⁸ Onsay Iisaa wi'i: «Hidon ardi e kaafaaje e bedi fii nangugol lan wa si ko ngujjo arandon? ⁴⁹ E hin-le mido wondi e mon nande woo ka *juulirde mawnde, mido

janna, on nangaali lan. Kono dun wadiri fii ko windanoo kon yo laato.»⁵⁰ Onsay be o wondunoo ben fow acci mo don, dogi.

⁵¹ Suka waaniido suddaare tun jokki mo, be nangi mo kanko kadi. ⁵² Kono o sortii, o acci don suddaare nden, o dogi, o bornaaki.

Fii no Iisaa Addiraa Yeeso Hooreebe Diina ben

(Mat. 26.57-68; Luk. 22.54, 63-71; Yhn. 18.12-14, 19-24)

⁵³ Onsay be nabi Iisaa ka yottinoowo mawdo sadaka on, ka hooreebe yottinoobe sadaka ben e mawbe ben e jannoobe fii Sariya on ben fow mottondiri don. ⁵⁴ Tawi Petruusu no iwtiri baawo makko ka wodditii haa ka nder tata yottinoowo mawdo sadaka on, o joododi e aynoobe ben, tawi himo iwlaade ka binde yiite.

⁵⁵ Tawi hooreebe yottinoobe sadaka ben e dental fewjoobe ben fow no dabba seedeeji e hoore Iisaa fii no be warira mo, kono latii be hebaali. ⁵⁶ Ko fii hari duudube no seeditoo penaale e hoore makko, kono tawi seedeeji mabbe din yaadaa.

⁵⁷ Kono wobbe immii, seeditii fenaande e hoore makko, tawi hibe wi'a: ⁵⁸ «Men nanii himo wi'a o lancay ndee juulirde mawnde darniraande juude yimbe, o darna wonnde goo e nder balde tati, nde tawata hinaa darniraande juude yimbe.»⁵⁹ Tawi hay e hoore dun seedee mabbe on yaadaa.

⁶⁰ Onsay yottinoowo mawdo sadaka on immii ka hakkunde dental, o landii Iisaa, o wi'i: «A jaabotaako hay huunde e ko bee woni seeditaade e hoore maa kon?»⁶¹ Kono Iisaa fanki, o jaabaaki hay huunde.

Yottinoowo mawdo sadaka on landii mo kadi, wi'i: «E hara ko an woni *Almasiihu on, dun ko *Biddo Alla Jom Barki on?»

⁶² Iisaa jaabii, wi'i: «Ko min. On yi'ay kadi Bii-Aaden on no joodii ka sengo naamo Jom Bawgal on, no arda e duule iwrude ka kammu.»

⁶³ Onsay yottinoowo mawđo sadaka on seeki conci mun din, wi'i: «Ko seedeeji hondi kadi faaladen? ⁶⁴ On nanii hoyre makko nden. Ko hondun fottandon e dun?»

Fow happirani mo foddugol e mayde. ⁶⁵ Wođbe woni e tuttugol mo, e buumugol mo yeeso ngon, e uttagol mo e hoore hibe wi'a mo: «Hotto!». Aynoobe ɓen kadi jađbori mo bante.

Fii no Petruusu Yeddiri fii Iisaa

(Mat. 26.69-75; Luk. 22.54-62; Yhn. 18.15-18, 25-27)

⁶⁶ Fewndo ko Petruusu joodii ley ka nder tata, godđo e rewbe kurkaaduube ka yottinoowo mawđo sadaka on ari. ⁶⁷ O yi'i Petruusu ka iwlotoo, o tenyini mo, o wi'i mo: «An kadi, hida wondunoo e Iisaa, oo jeyaado Naasirata.»

⁶⁸ O yeddi e hoore himo wi'a: «Mi andaa, mi faamaali ko hondun wondaa wi'ude.» O yalti, o yaari ka ley jimbe, tun ndontoori ndin yoggi.

⁶⁹ On debbo kurkaadujo ndaari mo, wi'i wonnoobe don ɓen kadi: «Oo ko tawdaado e mabbe.»⁷⁰ O yeddi kadi.

Bay nettii seeda, wonnoobe don ɓen wi'i Petruusu: «Ko haqiiqa, an ko a godđo e mabbe. Ko fii ko mo a Jaliilu.»

⁷¹ Onsay o woni e huditagol woonda, wi'a: «Mi andaa oo neddo mo wondon wowlude fii mun!»⁷² Tun ka dimmun ndontoori ndin yoggi. Petruusu anditi kisan kongol ngol Iisaa wi'unoo mo ngol: «Ado ndonto yoggude laabi didi, haray a yeddi fii an laabi tati.» Onsay o ugginii o wulli.

Fii no Iisaa Nabiraa ka Pilaatu

(Mat. 27.1-2, 11-26; Luk. 23.1-7, 13-25; Yhn. 18.28-40)

15 ¹ Bay weetii, hooreebe *yottinoobe sadaka ɓen e mawbe ɓen e jannoobe fii Sariya on ɓen e dental fewjoobe ɓen fow yewtidani. Be habbi Iisaa, ɓe nabi mo, ɓe

watti e juude Pilaatu.² Pilaatu landii mo, wi'i: «Hara ko an woni lando Yahuudiyanke'en?»

Iisaa jaabii mo: «Ko wano wi'irdaa non.»

³ Tawi hooreebe yottinoobe sadaka ɓen no libi toope duudude e hoore makko.

⁴ Pilaatu landitii mo kadi, wi'i: «A jaabotaako hay huunde? A nanii dee toope de ɓe woni libude e hoore maa fow?»

⁵ Kono Iisaa jaabaaki hay huunde e mun. Dun ȝaldini Pilaatu.

⁶ Tawi juldeere kala, o accitanay ɓe kasoojo gooto mo ɓe torinoo mo fii mun woo.⁷ Hari goddo no wi'ee Barabaasi no ka kaso, wondude e wadunoobe gere, e nder gere on ɓe itti hoore.⁸ Onsay jamaa on yáwi tawoyi Pilaatu, ɓe woni e toragol mo, wi'a yo o wadan ɓe ko woowani ɓe kon.

⁹ Pilaatu jaabii ɓe, wi'i: «Hara hidon yidi yo mi accitan on lando Yahuudiyanke'en?»¹⁰ Ko fii hari himo andunoo ko sabu nawliigu wadi si hooreebe yottinoobe sadaka ɓen wadiri mo e joge.¹¹ Kono hooreebe yottinoobe sadaka ɓen yuuni jamaa on fii yo Pilaatu accitan ɓe Barabaasi.

¹² Pilaatu yëttiti kadi haala kan, o wi'i ɓe: «Ko hondun non faaladon yo mi wadu oo mo wi'oton lando Yahuudiyankeebé ɓen?»

¹³ Be ewnii kadi, ɓe wi'i: «Fempee mo!»

¹⁴ Pilaatu wi'i ɓe kadi: «E hara ko hondun oo bonni?»

Be burti kadi sonkude, ewnoo, wi'a: «Fempee mo!»

¹⁵ Nde tawnoo Pilaatu no faalaa weltinde jamaa on, o accitani ɓe Barabaasi. Bay wonii Iisaa gaynaama focceede, kanko Pilaatu o wattii mo e juude mabbe fii yo o fempe.

Fii no Suufaaþe þen Wadiri Jalnori e hoore Iisaa

(Mat. 27.27-31; Yhn. 19.2-3)

¹⁶ Onsay suufaaþe þen naadi Iisaa ka nder tata, e maanaa ka nder suudu laamu. Be nodditi dental suufaaþe þen fow, ¹⁷ be borni mo dolokke bodeejo, ^sbe wadi ka hoore makko katanwol bulle saccangol. ¹⁸ E hoore dun, be woni e hiwragol mo, wi'a: «Salminaango e maa, yaa an Lando Yahuudiyankeeb!»¹⁹ Be tappiri mo kadi kalinwol ka hoore, be tutti mo, be jicci, be sujjinkinanii mo. ²⁰ Bay wonii be gaynii mo wadude jalnori, be borti mo dolokke bodeejo on, be borni mo conci makko din, be nabi mo fii femployegol.

Fii no Iisaa Wariraa

(Mat. 27.32-44; Luk. 23.26-43; Yhn. 19.17-27)

²¹ Tawi godðo no wi'ee Sim'uunu mo Sirenii no iwaynood ngesa, rewi don. Tawi ko on woni ben Aleksander e Rufuusa. Be karhi mo nabugol *leggal Iisaa altindiraangal ngal. ²² Onsay be nabi Iisaa e ndee nokkuure wi'eteende Golgota, ko woni firo dun ko «Nokkuure Laalagal Hoore». ²³ Be okkori mo njaram jillaadan *mirri, kono laatii o jabaali dan yarude. ²⁴ Onsay be fempi mo. Be sendiri conci makko din urþa^t fii andugol mo kala ko gasata hendaade.

²⁵ Wa ko be fempata mo, tawi ko e walluhaa on. ²⁶ Hari dundoo no windii fii ko o happiranaa kon: «Ko lando Yahuudiyanke'en.»²⁷ Tawi wuyþe dido no fempidaa e makko, godðo on ka sengo makko jaamo, oya on ka nano makko. ²⁸ Ko nii ko bindi din wi'unoo kon laatori, wonde: «O wattidete e bonþe þen.»^{u29} Tawi feyþoobe þen no hoyna mo, hayla hoore, wi'a: «Hey, an oo wi'unoodo lancay

^s15.17 Ko dolokke bodeejo lando on bornotonoo.

^t15.24 Zab. 22.19

^u15.28 Isa. 53.12

*juulirde mawnde nden, darnita nde e nder balde tati,³⁰ awa dandito an tigi, tippodaa ka leggal altindiraangal don!»

³¹ Tawi hooreebe yottinoobe sadaka 6en e jannoobe fii Sariya on 6en kadi no jalaynoo mo hakkunde mabbe, wi'a: «O dandii 6eya, kono o waawataa dandude hoore makko!³² Si ko o *Almasiihu on, dun ko lando *Isra'iila'en, yo o jippo ka leggal altindiraangal, yi'en, dun en gomdinay mo!» Tawi fempidaabe e makko 6en kadi no hoynaynoo mo.

Fii Mayde Iisaa nden

(Mat. 27.45-56; Luk. 23.44-49; Yhn. 19.28-30)

³³ Gila naange e hoore, niwre wadi e leydi ndin fow haa ka 6aawo fanaa.³⁴ Wa fewndo ka 6aawo fanaa, Iisaa ewnii ko tiidi, o wi'i: «Iilooyi, Iilooyi, lama sabaxtanii?»^w. (Dun no firi: Alla an, Alla an, ko fii hondun tertanidaa mi?)

³⁵ Wobbe e wonnoobe don 6en nani ko o wi'i kon, be wi'i: «On nanii, o noddii Iiliya!»

³⁶ Tun goddo e mabbe dogi, yettoyi linsere, o bubbini nde haa nde loppii ndiyan lammudan, o wadi nde e tuggordu, o townani mo fii yo o yaru, e hoore himo wi'a: «Accee, ndaaren si Iiliya aray, tippina mo.»

³⁷ Iisaa ewnii ko tiidi, onsay o timmi.

³⁸ Wirngallo* ngon ka juulirde mawnde seekii, woni pecce didi, gila dow haa ley.

³⁹ Bay hooreejo suufaabe wonnoodo yeeso makko kanko Iisaa on yi'ii no o timmiri non, o wi'i: «Ka haqiiqa, hari oo neddo ko *Biddo Alla!»

⁴⁰ Tawi rewbe kadi no ka wodditii, no ndaara. Tawi no tawdaa e mabbe Mariyama jeyaado Magaduuna e Mariyama yumma Yaaquuba tosooko on e Yuusufu, e Saliimatu.⁴¹ Tawi ko 6en jokkunoo mo kanko Iisaa, no kurkanoo mo wa fewndo ko o wonnoodo Jaliilu, e duudube goo kadi be o yaadunoo Yerusalaam.

^w15.34 Zab. 22.2

Fii no Iisaa Surriraa

(Mat. 27.57-61; Luk. 23.50-56; Yhn. 19.38-42)

⁴² Hawrondiri nibbii, tawi ko hebulanagol *nalaande fowteteende nden. ⁴³ Onsay oo wi'eteedo Yuusufu hewti. On ko hooloraado goo e ngal dental mabbe, on ko jeyaado Raamati, tawi on kajun tigi ko *laamu Alla ngun o tijji. O hebi cuucal yahugol ka Pilaatu, toroo mo hettugol furee Iisaa on. ⁴⁴ Pilaatu ɻaldì ko tawi o maayii kon. O noddì hooreejo suufaabe 6en, o landii mo si tawii o maayiino. ⁴⁵ Bay hooreejo on humpitii mo dun, o jonniti Yuusufu furee Iisaa on. ⁴⁶ Kanko Yuusufu o soodoyi kasannge, o tippini furee Iisaa on ka hoore leggal, o tumbi e kasannge, o belnoyi mo e qaburu asaado e feto. O talli hayre, o wadi ka dambugal qaburu. ⁴⁷ Tawi Mariyama jeyaado Magaduuna e Mariyama yumma Yuusufu no ndaara ka o belniraa.

Fii Ummatal Iisaa Almasiihu on

(Mat. 28.1-8; Luk. 24.1-12; Yhn. 20.1-10)

16 ¹Bay *nalaande fowteteende nden feyyii, dun ko aseweere nden, Mariyama jeyaado Magaduuna e Mariyama yumma Yaaquuba, e Saliiamatu soodi tiiri fii ko 6e fulla e furee Iisaa on. ² E alat, dun ko jallal aranal e nder yontere nden, 6en rewbe dawi bimbi subaka ka yenaande, dun ko ka pudal naange. ³ Tawi hibe wi'indira: «Taw ko hombo tallanta en hayre wonde nden ka dambugal yenaande nden?»⁴ Tun 6e banti gite, 6e haynii, 6e tawi nden hayre njanne tallaama. ⁵ Be naati ka nder yenaande, 6e yi'i suka gorko, no bornii daneeji, no joodsori ka sengo jaamo. Be ɻaldfi, 6e huli.

⁶ On wi'ibe: «Wota on hulu! Iisaa oo jeyaado Naasirata, fempaado on, mo wondon dabbitude on, immitike, o alaa doo. E hino nokkuure ka o belnanoo don.

⁷ Awa yahee andinoyon taalibaabe makko 6en e Petruusu, o adoyto on Jaliilu. Ko ton yi'oyton mo, wano o wiirunoo on non.»

⁸ Onsay ɓe dogi ɓe yalti ka yenaande ko fii hari diwnol e kaawee hebii ɓe. Kono laatii ɓe wowlanaali hay gooto huunde, ko fii hari hibe huli.

Fii no Iisaa Feenirani Sahaabaabe ben Sappoo e Go'o

(Mat. 28.9-10; Yn 20.11-18)

⁹ Bay Iisaa immitike e jalaande aranere nden e nder yontere nden bimbi, ko o adii hollitaade ko Mariyama jeyaado Magaduuna, on mo o yaltinnoo jinnaaji jeedidi e mun. ¹⁰ On yahi, o banginanoyi dün ɓe Iisaa wondunoo ben, tawi ben no yoomi, no wulla. ¹¹ Bay ɓe nanii wonde himo wuuri, awa kadi kanko debbo on o yi'ii mo, laatii ɓe hoolaaki mo.

¹² Bawto dün, tawi dido e mabbe no e hoore laawol, no yahaynoo e fulawaa, kanko Iisaa o feenirani ɓe noone goo. ¹³ Ben kadi arti, holliti dun ɓeyya, laatii ɓe hoolaaki ben kadi. ¹⁴ Ka sakkitorun o feenani sappoo e go'oobe ben, wa fewndo ko ɓe joodii fii jaamugol, o feli ɓe sabu angal gomdinal mabbe ngal e cattal berde mabbe den, fii ko ɓe hoolaaki yi'unoobe mo ben kon bawto o immintineede.

¹⁵ E hoore dün o wi'i ɓe: «Yahee e aduna on fow, fejninanon tageefo ngon fow Kibaaru Moyyo on. ¹⁶ Kala on gomdindo, *lootaa maande kisiyee, dandoyte, kono kala on mo gomdinaali, happante. ¹⁷ E hino maandeeji wondaydi e ben gomdinbe: e innde an ɓe radoyto jinnaaji din, ɓe wowla kadi e *haalaaji goo, ¹⁸ ɓe nanga bolle, si ɓe yaru kadi njaram waroojan, dün masinbintaa ɓe. Si ɓe *fawoyii kadi juude mabbe den e hoore nawnube ben, ben ndikkay.»

¹⁹ Bay Iisaa Joomi on gaynii ɓe yewtude, o yentinaa ka kammu, o joodori ka sengo jaamo Alla. ²⁰ Kambe kadi ɓe yahi, ɓe waajoyii hen fow, tawi Joomiraado on no gollidude e mabbe, o haqinqiniri daalol ngol maandeeji di ngol wondunoo din.

ÉVANGILE SELON MARC

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée